

東
華
續
錄

東華續錄

臣王先謙

臣周澗
瀚蕃恭校

秋七月乙丑諭前因顏希深奏湖南州縣佐雜調委過多曾明降諭旨令該撫查辦並諭阿桂於回京時沿途留心體察茲據阿桂覆奏此事不獨湖南一省爲然卽如雲貴二省緣逃兵處分一項州縣到任後扣足一年如有未經緝獲之犯卽應降調離任上司或因人材起見或因降調太多卽委調他處相循展轉遂至爲數漸多等語是各督撫之遞相調署專爲屬員倖免處分卽此可見其事君不以誠矣州縣緝獲逃犯定例四參限滿降調原准其出具考語送部引見卽云逃兵處分褫職一年屆期未獲例應降調此等尙係公過該督撫等如果以人地實在相需奏請保留朕亦

無不量度情形俯如所請何必因此巧爲設法委調紛繁致蹈欺飾之咎卽如王倫案內之逸犯歸太劉煥通緝數年至今未獲可見各州縣之不能實心任事然亦未嘗因此罷斥一官則督撫等又何必爲此過慮乎見據阿桂另摺奏請酌定章程已交部議奏嗣後各督撫務須一秉至公毋再輕爲更調儻敢仍蹈前轍致滋流弊必將該督撫從重治罪將此通諭知之○戊辰諭據顏希深奏湖南州縣佐雜調署過多一事朕卽明降諭旨令各該督撫一體查辦並諭阿桂於回京時沿途留心體察昨據阿桂覆奏此事不獨湖南一省爲然卽如雲貴二省緣逃兵處分降調太多委署他處相循展轉遂至爲數漸多等語朕以州縣委署過多自屬各省通弊復降旨通諭各督撫務須一秉至公毋再輕爲更調儻敢仍蹈前轍必將該督撫從重治罪惟以儆戒將來其既往之咎業

已寬免矣今敦福至京朕令軍機大臣將顏希深及阿桂奏摺並
朕兩次所降諭旨令敦福閱看並詢以因何如此辦理之故敦福
自當切實引咎亦屬已往不追乃敦福不能體朕大公至正之諭
又不知感朕曲爲寬免之恩一味藉詞支飾並不俯首認罪是敦
福非但毫無誠心實屬糊塗之至矣近日吏部議處敦福失察彭
理及錯擬兵丁罪名二案例應降五級調用朕以爲究屬公過俱
已折本本欲加恩留任今敦福如此覆奏竟是無福承受朕恩卽
倉場侍郎亦不堪勝任矣敦福卽著照部議降五級調用其倉場
侍郎員缺著德福補授所有刑部侍郎員缺著博清額兼署○諭
軍機大臣等李侍堯奏緬匪蓋拉機寄稟提鎮及見在辦理情形
一摺所辦甚合機宜已於摺內批示矣看來蓋拉機此次之稟顯
係與得魯蘊不合從中作梗故不待遞至阿瓦輒寄此稟思欲激

怒天朝致令債事其情甚爲可惡李侍堯付之不答所見甚是且令遊擊哈三嚴諭來差波凹等傳諭蓋拉機以得魯蘊既管不得爾蓋拉機又豈能管得何不候檄文傳到阿瓦徑行差人送稟殊屬非理等語實爲義正詞嚴此後蓋拉機如續有稟文仍當置之不理若緬酋贊角牙及得魯蘊等接到檄文呈具覆稟如係還人進貢自可隨機辦理或其詞稍涉游移卽當將蓋拉機擅拆發還阿瓦檄文妄行續稟之事諭知匪酋以蓋拉機敢於阻撓爾等成議妄誕自專實出情理之外或贊角牙及得魯蘊等聞知將蓋拉機治罪便可少一梗阻之人於事自更有益至此時惟有嚴查邊隘不許貿易之人私自偷漏餘仍不動聲色使緬匪無可揣測此外亦並無他法李侍堯自能斟酌妥辦也將此由五百里傳諭李侍堯知之並將李侍堯原摺及所譯緬匪稟詞鈔寄阿桂閱看李

侍堯如續得有緬匪信息仍卽由驛迅速具奏○癸酉諭蘇爾相著發往雲南交與李侍堯遇有遊擊缺出卽行補用仍賞假准其暫回原籍省看墳塋部署一切再行赴滇候補至跟隨蘇爾相之士把總多朝相著加恩賞銀一百兩令其仍回隴川其兵丁之見在隨出者各賞銀十兩回本營當差其在老官屯病故者著交李侍堯查明咨部照出征病亡例減半議卹並查明各兵子嗣准其入營食糧以示優卹○甲戌諭從前征勦緬甸時聞遊擊素克津泰打仗未出守備王呈瑞馬子建爲緬匪羈留偷生苟活是以分別從嚴辦理今詢據蘇爾相稱素克津泰在阿瓦自縊身死王呈瑞馬子建亦皆投江自盡死此三人均可嘉憫素克津泰之子阿克敦先已犯案發遣乃其自取罪戾無可矜原著加恩將伊孫色克圖以驍騎校用王呈瑞馬子建二人所查家產著賞還並其子

著查明加恩以干總用○定州縣調署按季咨報例○己卯命修雲南盤龍江閘壩○辛巳諭前此楊甯在木邦所統綠旗弁兵臨陣畏蕙遇賊卽行潰散情罪甚重自當速行緝獲卽正典刑以肅軍紀而承緝各官玩忽從事不可不嚴定處分俾知懲儆乃接緝督緝之員日漸懈弛復經降旨令再予限一年緝拏如逾限未能全獲不將承緝各員嚴參懲治定將彰寶李湖從重議處嗣經部臣定議分別降調降留前次所降諭旨原就彼時勒限一年俾各上緊緝拏而非永以爲例也乃滇省自是年爲始每屆一年卽將承緝督緝之員參奏議處一次而督撫又不自請處分此乃彰寶李湖從前辦理錯誤所致今彰寶已於別案獲罪李湖亦經降調均不必咎其既往但數年以來承緝各員文職降調者十三員武職降調者至有六十四員同爲疏防處分而多寡懸殊若此必有

別故昨據阿桂查奏調署州縣過多之案云不獨湖南爲然卽滇省亦係如此由於上司等欲爲屬員倖免承緝限滿處分遂爾曲爲遷就此非以誠事君之道也況文職則緝限將滿之時上司輒爲委調令其規避而武職則以無可藉詞槩從實降致使向隅者眾非朕令查何以得知所有從前節次實降各員文職旣經歷任督撫徇庇巧爲脫罪則所降者人數本屬無多其中亦未必有才猷出眾之員轉不必查辦其武職著交該部查明將原議降調之千總以上行文調取引見至把總外委等員著交李侍堯查明驗其人材年力尙堪驅策者仍酌量奏聞以原官委用朕近覽明史大率重文輕武其時文員每妄自尊大互相袒護而蔑視將弁至以麤官目之多方屈抑一旦有事文職旣一籌莫展其效力戎行者朝臣復從而掣其肘自速危亡而不可救最爲弊政我朝列

聖相承文武並重法良意美朕臨御以來屢降諭旨訓飭諸臣毋生歧視督撫等雖不敢顯分畛域故蹈前車然平日不免偏向文員意爲曲徇而於武職不啻秦越視之卽如滇省參劾承緝逃兵之案里吏議者武職五倍於文員其任情愛憎之私已可槩見歷任督撫本應隨案察治今旣另行查辦其前罪姑免深求然此等軒輊阿私之弊恐各省皆所不免朕旣洞燭其隱不可不明白宣示以儆將來督撫同受封疆重寄文武皆其所屬本不當意存分別妄爲抑揚於其閒且總督統司軍務於武職尤不宜置諸膜外公忠體國之謂何其可不各加猛省耶嗣後各督撫務宜剷除積習勿復稍涉偏倚以副朕一視同仁之意若再不知悛改經朕鑒察及之不復能曲貸也至楊甯潰兵一案距今已閱十年而逃兵就獲者旣已十分之七其未經就獲之犯或於逃後病故亦未可

知且緬匪已知悔罪送還蘇爾相懇請納貢投誠從此邊境輯甯更無用兵之事所有楊甯案內未獲逃兵其按緝督緝之文武各員嗣後均著免其定限議處如有能續行緝獲者仍照前將該犯卽行正法其緝獲之員並著該督撫奏聞量予議敘以示獎勵至該逃兵逗遛藏匿之所地方官失察之咎實所難辭一經訊明卽查明職名送部議處如此勸懲互用庶各員益知感奮至金川節次逃兵非楊甯案內潰兵可比自當嚴緝務獲勿使漏網其承緝接緝處分著照緝拏重犯未獲舊例辦理將此通諭知之○乙酉諭軍機大臣等據楊景素奏暹羅鄭昭遣有夷使三名來粵叩請進貢並押解花肚番六名等語噶阿噶左等今經暹羅送到自應委員解京所有前次代擬李侍堯檄稟原屬詢探之意今鄭昭旣已具稟前檄卽無庸發去至暹羅之事屢次所降諭旨甚明鄭昭

此次稟來楊景素卽當一面奏聞一面辦理不必俟請旨再辨此乃楊景素未經閱歷大事不及李侍堯之練達故不免拘泥也茲命軍機大臣代楊景素擬作檄稟諭以本督部堂接閱來稟據稱暹羅殘破以後朝貢久疏今欲循舊例備貢差人具稟懇爲轉奏等語具見惓誠而收合暹羅餘眾思報故主之仇亦能明於大義且爾數年來屢經送回緬甸所留內地兵民又將所獲緬匪節次解送實屬誠心恭順是以前任李總督嘉爾忠謹於爾兩次請買硫磺鐵鍋等物俱准買回應用今春李總督調任雲貴時向本督部堂言爾爲暹羅故主殺賊報仇遂爲眾所推奉因詔氏無人卽行統攝國事且爾心向天朝屢效誠盡自當予以獎勵此後如有稟懇之事不妨酌量辦理本督部堂莅任以來悉照前例今爾等既有備貢之請可以准行俟爾貢物到境當爲轉奏至爾所稱必

藉天威以彰民望意欲懇求封號而又不敢明言如此隱躍其詞未便據情入告爾果虔修貢禮遣使恭進將國人推戴情殷詔氏已無嫡派明晰聲敘具稟請封本督部堂自當代爾奏聞大皇帝恭候加恩方爲名正言順至爾欲征討緬甸爲故主復仇聽爾自爲之內地斷無發兵相助之理中國征勦所至餉足兵強前此平定準部回部昨歲平定兩金川並未稍藉外邦之力諒爾亦當聞知況緬匪近日已知悔罪送還內地之人懇求開關納貢此後更無可加兵然亦必不助緬以攻他國爾如欲請封轉不必以攻勦緬匪爲詞也將此由六百里傳諭楊景素照繕發往其來使起身時酌量以禮遣回如鄭昭依檄具稟進貢請封楊景素即可據情由驛速奏○丙戌命甘肅應徵各屬番糧草束隨戊戌年地丁錢糧一體蠲免其河東河西額徵屯糧草束免十分之三○命甘肅

民人願往烏魯木齊墾地者照例咨送○己丑諭軍機大臣等前因郭羅克賊番殺害青海公禮塔爾一案兇犯吹斯枯爾拉布坦竄逸稽誅曾責成明亮等勒限一年嚴緝各犯務獲正法今據明亮等奏稱土司麻克蘇爾衮布雖連月跟隨偵緝並不實心設法擒賊因將該土司帶至耶隨地方扣留羈押責令寄信伊弟伊子獻出從犯結果喀拉布木雍中吉策丹四名分別審辦仍將該土司扣留著落伊弟等實力緝獲兇犯等語所辦甚是此皆查禮等懼干罪譴始設法嚴辦卽獲從犯四名可見凡事果肯認真斷無不效之理今旣辦有頭緒益當上緊督緝務獲正兇而後已不可因已獲從犯復事因循致重案久懸不結著傳諭明亮等卽董飭查禮等照前實力妥辦勿稍玩忽稽延仍將會否緝獲要犯緣由每三月奏聞一次至綽斯甲布布拉克底巴旺黨壩等各土司數

年以來跟隨打仗素著勤勞曾面諭明亮到川後會同總督文綬將綽斯甲布土司等被金川侵占之地逐加詳勘查明無礙田土繪圖具奏候朕降旨酌量賞給明亮到川後已閱半年此事亦應籌辦前於七月初曾傳旨詢問此時亦應接奉著再諭明亮等迅速詳查繪圖具奏將此由五百里發往諭令知之○准從前冒籍得缺人員呈明迴避

八月己亥諭刑部覈擬直隸省王錦壽死繼母王苗氏之母苗趙氏一案稱該犯與苗趙氏並無服制改擬斬決引例載母黨有犯除親母嫡母本生母黨仍照服制定擬外其餘均從凡論等語所擬殊未允協爲人後者爲所後父母持三年之服而於本生父母降服期年卽五服之制亦以所後爲推而於本生皆降一等是所後之親屬服制皆較本生爲重何於所後之外姻獨不得比於本

生之有服乎若慮所後之外姻尊長於甥及外孫謂非其所自出故加陵虐或置於死自可權其曲直繩之以法何必削其服制以爲防乎且如本宗尊長非理謀殺卑幼其恩義已絕卽照凡人擬抵則外姻尊長亦可援以爲例並不分所後及本生也若卑幼敢於謀殺外姻尊長卽爲干犯名義自當一例科斷又豈可強爲分別而於所後之外姻視本生轉爲末減乎況此案王錦因覬繼母苗氏改嫁得以花費家財而瞋其外祖母苗趙氏從中阻止遂爾懷忿謀殺理既甚曲性復兇頑其情罪實爲可惡刑部乃因其無服輒行改擬豈爲情法之平頃詢之刑部堂官此例係乾隆二十一年所定閱其例本惟事拘牽文義而揆之天理人情均未允當又豈明刑弼教之義著刑部將此例悉心斟酌更定所有王錦一案卽照新例另行定擬具奏尋議凡爲人後者於本生親屬旣

屬降服則爲所後母之父母自應與親母之父母一例持服小功五月此外爲繼母之父母等項應請悉照 欽定儀禮義疏當服六項一併增入服圖如遇有干犯卽照卑幼犯本宗小功尊屬律毆殺謀故殺均擬斬立決謀殺已行已傷及鬪毆傷者俱各照服制分別定擬其餘爲繼母之父母等項亦均照所後母之父母一例辦理至親母之父母仍照本律毆死外祖父母者斬謀故殺者凌遲處死再爲人後者爲本生母之父母服雖降小功一等而恩亦較重其干犯之罪應與犯小功尊屬同科推之各項甥舅等服制悉按前項增入照外姻尊卑長幼治罪如有於非所自出之外孫及甥故加陵虐或置於死臨時權其曲直接情定罪不必以服制爲限其王錦一案卽照新例定擬再因母卽親母君母卽嫡母之義恐民間未能徧悉應於服圖內改爲親母嫡母又近時出妻

繼娶者少妻亡繼娶者多應將母出爲繼母之父母一項依義疏
內在堂繼母之文於服圖內改爲在堂繼母之父母以便通俗引
用從之○諭刑部覈擬張二卽張丕林扎死伊妻徐氏一案照夫
故殺妻律問以絞候所擬尙未允協此案張二攜妻徐氏賣姦潘
三時往姦宿索錢爭毆迨經官責逐張二計欲躲避因徐氏不允
輒起殺機奪刀扎斃是張二甘心將徐氏賣姦其夫婦之義早絕
乃復逞兇戕命自當與凡人故殺同科猶之妻妾因姦謀殺本夫
者律應凌遲若因本夫縱容抑勒其妻妾與人通姦罪止斬決則
縱姦之本夫復殺其妻卽不得以尋常夫故殺妻律擬斷蓋其夫
縱妻賣姦已屬不知羞愧又忍而置之於死情更兇惡若復拘夫
婦名義稍從末減何以勵廉恥而維風化乎著刑部將此例另行
斟酌改定所有張二一案卽著照新例定擬具奏尋議嗣後以妻

賈姦之夫故殺妻者以凡論其非本夫起意賈姦者仍悉依律例辦理其張二一案卽照新例改擬從之○庚子命烏魯木齊州縣額徵糧草於戊戌年隨同甘肅地丁銀兩免三分之一○辛丑論昨歲平定兩金川大功告蒞其地已歸入版圖安屯耕種所有該處名山大川效靈助順自應列入祀典曾降旨令明亮等查奏今據奏覆金川之索烏甲索二山及小金川之噶爾多山均爲番眾所敬奉大軍進剿時亦頗著靈應等語又金川大河當官兵攻剿勒烏圍時立柵沿河堅持數日適值陰雨連綿河水旋長旋消於沿灘柵寨並無妨礙及攻得勒烏圍官兵移柵後河水卽陡然漲發前所立柵之處均漫水甚大河神效順實贊成功均應春秋秩祀以彰報功之義著載入祀典用垂久遠所有撰文及一切禮儀交各該衙門照例辦理○戊申吏部議奏計參才力不及之廣東

定安縣知縣馬用觀係由教職保送其申詳之司道府州縣等官例應降級調用其原保不慎之前任陝甘學政光祿寺卿吳綬紹照例降調得旨此案吏部議將原保舉之督撫學政降二級調用其申詳之司道府州縣等官降三級調用所辦未得情理之平保舉教職雖由司道府縣等轉詳然其人之堪膺舉薦與否則由督撫學政擬定主察使司道等所詳未當督撫等原可較正既已列之薦剡其處分自應較重而原詳者酌予從輕方爲允協今乃重議司道等官而輕議督撫學政本末不倒置乎至所保堪膺民社之員後經他省以才力不及參劾者其原保題之上司等固難辭咎然竟議以降級調用不准抵銷亦未免過當且才力不及尙非大過若於此而遽將原保之上司議以實降設或所保之員有犯貪婪不法者其原保官又當如何加重乎況才力不及並非實在

劣蹟可指若定以降調重例恐所轄之督撫與原保之督撫學政或有微嫌卽以不及劾其所舉之人俾罹實降以遏其私意而督撫或有與原保官相得者於其所舉之人卽實係才力不及轉爲之瞻徇姑容此更於吏治有關不可不防其流弊朕辦理庶務一秉至公凡事有不協於理雖此等尋常議疏亦不肯稍爲忽略卽此可見爲君之難而朕日理萬幾實無一事之不敢不加審慎矣所有議處原保上司之例著該部另行詳晰妥議吳綬詔此案卽照新例另議具奏尋議嗣後保送教職人員除事犯貪酷不法等款仍照舊例分別議處如僅以才力不及題參或仍奏請改教者將主槩保薦之督撫學政改爲降二級留任申詳司道府等官改爲降一級留任此案原保之前任陝甘學政見任光祿寺卿吳綬詔照見定例降二級留任再查各部院主事等官保送直隸州知

州遇有才不勝任之員原保堂官向有處分專例應請嗣後亦照此例將原保官降二級留任從之○辛亥吏部議准陝西巡撫畢沅奏華州近年事務倍繁請添設州判一將蒲城縣縣丞裁汰改設從之○壬子諭頃閱金史世祖紀云金世祖居完顏部其地有白山黑水白山卽長白山黑水卽黑龍江本朝肇興東土山川鍾毓與大金正同史又稱金之先山靺鞨部古肅慎地我朝肇興時舊稱滿珠所屬曰珠申後改稱滿珠而漢字相沿譌爲滿洲其寔卽古肅慎爲珠申之轉音更足徵疆域之相同矣又後漢書三韓傳謂辰韓人兒生欲令頭扁押之以石夫兒初墮地豈堪以石押頭其說甚悖於理國朝舊俗兒生數日置卧具令兒仰寢其中久而腦骨自平頭形似扁斯乃習而自然無足爲異辰韓或亦類是范蔚宗不得其故曲爲之解甚矣其妄也若夫三韓命名第列辰

韓馬韓弁韓而不詳其義意當時三國必有三汗各統其一史家不知汗爲君長之稱遂以音同誤譯而庸鄙者甚至譌韓爲族姓尤不足當一喙向曾有三韓訂謬之作惜未令人盡讀之而共喻耳若唐時所稱雞林應卽今吉林之譌而新羅百濟諸國亦皆其附近之地顧昔人無能考證者致明季狂誕之徒尋摘字句肆爲詆毀此如桀犬之吠無庸深較而舛誤之甚者則不可以不辨若夫東夷之說因地得名如孟子稱舜東夷之人文王西夷之人此無可諱亦不必諱至如尊崇本朝者謂雖與大金俱在東方而非其同部則所見殊小我朝得姓曰愛新覺羅氏國語謂金曰愛新可爲金源同派之證蓋我朝在大金時未嘗非完顏氏之服屬猶之完顏氏在今日皆我朝之臣僕普天率土統於一尊理固如斯也譬之漢唐宋明之相代豈皆非其勝朝之臣僕乎又有云我

祖宗時曾受明龍虎將軍封號亦無足異我朝初起時明國尙未
削弱因欲與我修好借此以結兩國之歡我朝固不妨爲樂天保
世之計迫我國聲威日振明之綱紀日隳且彼妄信讒言潛謀戕
害於是我太祖赫然振怒以七大恨告天興師報復自薩爾
汗松山杏山諸戰大敗明兵明人欲與我求和斥而不許彼尙安
能輕侮我朝乎且漢高乃秦之亭長唐祖乃隋之列公宋爲周之
近臣明爲元之百姓或擾或侵不復顧惜名義若我朝乃明與國
當闢賊擾亂明社旣移之後吳三桂迎迓王師入關爲之報仇殺
賊然後我世祖章皇帝定鼎燕京統一寰宇是得天下之堂堂
正正孰有如我本朝者乎至若我國家誕膺天眷朱果發祥亦
如商之元鳥降生周之高禡屢武紀以爲受命之符要之仍係大
金部族且天女所浴之布勒瑚里池卽在長白山原不外白山黑

水之境也又金世祖紀稱唐時靺鞨有渤海王傳十餘世有文字
禮樂是金之先卽有字矣而本朝國書則自太祖時命額爾德
尼巴克什等遵製通行或金初之字其後因式微散佚遂爾失傳
至我朝復爲剏造未可知也他如建置之沿革滿洲之始基與夫
古今地名同異並當詳加稽考勒爲一書垂示天下萬世著派大
學士阿桂于敏中侍郎和珅董誥悉心檢覈分條編輯以次呈覽
候朕親加釐定用昭傳信而闕羣惑並將此通諭知之尋阿桂等
奏編纂事定酌擬凡例呈覽並請欽定嘉名得旨知道了書名
著定爲滿洲源流考○己未濬淮揚運河○李宗文因病解任調
范時紀爲禮部侍郎以蔣賜棨爲倉場侍郎

九月甲子改甘肅涇州爲直隸州○戊辰諭近日刑部進呈雲南
貴州秋審本朕詳加披閱其中情節有械鬪各傷一命及以金刃
東華續錄

傷人者同一案而分擬情實緩決殊未允協已交該部另行改擬
矣夫殺人者死漢初之約已然今擇其情輕者列於緩決已屬寬
典若糾眾械鬪則爲害於世道人心漸不可長是以朕於句到時
遇有械鬪各傷一命之案並予句決邇年來其風稍戢然尙有未
能盡熄者至鬪毆之案情形本自不同有並非互鬪亦援鬪毆律
條問擬者因係積久相沿姑仍其舊而秋讞時之分別情實緩決
則輕重當有權衡如彼此俱以手足相毆及各持金刃互格因而
傷重致斃者兩造情事相等原可入於緩決若死者僅以詈罵起
釁或用手足先毆而兇犯輒持金刃抵拒殺傷其爲逞強斃命已
可槩見且金刃本可殺人之物若死者並非持械豈能徒手相當
卽非頓起殺機其與故殺亦所差一閒此等而不入於情實又何
以懲暴除兇況爲法司者惟當準情酌理務得其平若稍存陰隱

之見曲從開脫實乖明允之道且死者何辜甯不含冤地下乎嗣後內外問刑衙門於秋審關毆案犯並當遵旨悉心定擬毋枉毋縱庶好勇鬪狠之徒共知儆戒不敢輕蹈法網所全實多是正辟以止辟也將此通諭中外知之○庚午諭昨刑部進呈秋審本內有死者僅用手足先毆而兇犯輒持金刃殺傷者同一案而分擬情實緩決未爲允協因降旨令嗣後內外問刑衙門於秋審關毆案犯悉心定擬毋有枉縱今刑部奏請將本年已入緩決各案內查明死者並未持械兇犯以金刃傷致斃者俱補繕黃冊改擬情實進呈所辦又屬過當斷不可行朕昨降諭旨通飭酌定情實之意原因近年金刃傷人之案較多而秋審時每列入緩決且數年後仍得減等發落於是好勇鬪狠之徒妄謂殺人可以倖生遂罔知儆戒輕蹈法網不可不示以嚴懲俾知用金刃殺傷徒手之人

者斷難邀免庶可稍戢其逞強之心以免罹必誅之罪是以前旨有嗣後之言欲使眾共知曉懷刑章而不敢復犯若教而不從則是自取其死於情理均無可恕矣今刑部請於本年卽行改正竟似朕急欲多句百十人實屬誤會朕意且立法自有次第何不可待之有而爲是汲汲乎著刑部轉行各督撫將朕先後兩旨徧行出示曉諭雖窮鄉僻壤咸使聞知如此曉諭之後儻有仍用金刃殺傷徒手之人者卽當擬入情實朕酌定其情卽不予句而以金刃闕殺者槩不予以減等庶幾辟以止辟之義至明年秋審內儻有未聞此旨以前之案亦不必辦及俟後年各省秋審時再行分別辦理俾共知朕仁義並施化民約法之意將此通諭中外知之

○壬申 上啟鑒謁 泰陵 泰東陵○丙子 上謁 泰陵

泰東陵回鑾○壬午 上還京師○諭盛京乃我朝定都創業之

地 永陵 福陵 昭陵巍然在望 皇祖聖祖仁皇帝御極六

十一年曾經三次展謁 孝思追遠常切欽承朕自乾隆八年及

十九年恭謁 祖陵以來迄今已二十餘年遙企 橋山每深依

戀常時恭閱 太祖 太宗實錄敬惟 開創艱難佑啓萬年統

緒茲際 重熙累洽之庥溯念 前勞輒不禁愀然淚下而 松

雲蔥鬱向惟再莅瞻仰心甚歉焉朕見在精力如前尙堪遠涉擬

於明歲秋間前詣盛京恭謁 祖陵以申積悃所有蹕路往來俱

由內地出山海關而行於置頓安營較爲妥便尙在二十七月之

內途次不行圍至盛京時不升殿不筵宴朝鮮國毋庸遣使朝賀

其扎薩克蒙古王公等亦毋庸朝覲至啓鑾日期屆時再降諭旨

將此通諭知之○辛卯賞給新疆鄉會試舉子馳驛

冬十月甲午改甘肅沙州協爲營安西營爲協○戊戌諭戶部尙

東華續錄 卷八十一

書果毅繼勇公豐昇額秉性忠誠奉職勤恪昨以副將軍征勦金川時殫力宣忱奮勇著績能承父志以紹祖風深可嘉尚是以降旨於伊所襲果毅公爵加賞繼勇之號以獎勤勞伊年力富強正堪任使乃於前月忽遭沈疴卽派太醫院堂官診視頻加存問兼賜人蔭以冀速痊茲遽聞溘逝深爲軫惻已加恩賞給經被著派散秩大臣一員侍衛十員往奠茶酒並著加恩晉贈太子太保所有應得卹典仍著該部察例具奏醇子祭葬諡誠武○諭我朝定鼎之初額亦都巴圖魯曾立大功因係勳舊世家其子孫累世俱有爲領侍衛內大臣者今豐昇額所遺正白旗領侍衛內大臣員缺著加恩以特成額補授特成額奉到此旨卽著來京○諭據伯忠奏稱回部郡王額敏和卓病故額敏和卓效力有年今聞溘逝深爲軫念著加恩賞銀五百兩治喪並派伯忠往奠茶酒其所賞

銀兩卽由彼處貯庫銀兩內支給○調英廉爲戶部尙書仍兼管

刑部事以德福爲刑部尙書

由倉場侍郎遷

○己亥諭四庫全書館進呈

李薦濟南集其詠鳳凰臺一首有漢徹方秦政何乃誤至斯之語

於理不順因檢閱北史文苑傳敘亦有頡頏漢徹跨躡曹丕之句

頡府因而錄入均屬未協秦始皇焚書阬儒其酷虐不可枚舉號

爲無道秦後之人深惡痛絕因而顯斥其名尙無不可若曹丕躬

爲篡逆稱名亦宜至漢武帝在漢室爲振作有爲之主且興賢使

能獨持綱紀雖黷武惑溺神仙乃其小疵豈得直書其名與秦政

曹丕並論乎且自古無道之君至桀紂而止故有指爲獨夫受者

若漢之桓靈昏庸狂暴遂致滅亡亦未聞稱名指斥何於武帝轉

從貶抑乎又如南北朝彼此互相詆毀南朝臣子稱北朝主之名

北朝臣子稱南朝主之名宋之於金元金元之於宋亦然此皆局

於其地之私心雖非天下之公尙無傷正理若李延壽乃唐臣李
廌乃宋臣其於中國正統之漢武帝伊祖未嘗不爲其臣豈應率
逞筆端罔顧名義輕妄若此且朕御製詩文內如周程張朱皆稱
爲子不斥其名又如韓昌黎蘇東坡諸人或有入詩文者亦止
稱其號而不名朕於異代之臣尙不欲直呼其名千古以下之臣
轉將千古以上之君稱名不諱有是理乎朕命諸臣辦理四庫全
書親加披覽見有不協於理者如關帝習諡之類卽降旨隨時釐
正惟以準大中至正之道爲萬世嚴褒貶卽以此衡是非此等背
理稱名之謬豈可不爲改正以昭示方來著交武英殿將北史文
苑傳敘改爲漢武韻府刪去此條酌爲改刊所有陳設之書悉行
改補其李廌集亦一體更正並諭四庫全書館臣等於校刊書籍
內遇有似此者俱加籤擬改聲明進呈毋稍忽略將此通諭知之

○調舒常爲倉場侍郎

由工部侍郎調

○庚子吳嗣爵以老乞休允之調

王杰爲吏部侍郎以錢汝誠爲刑部侍郎○辛丑裁雲南普安營

改景蒙營都司爲遊擊○癸卯諭據明亮等奏前因郭羅克賊番

殺害青海公禮塔爾一案尙有兇犯未獲將該土司瑪克蘇爾袞

布扣留內地令伊弟索朗勒爾務實力緝兇今該土司因不服水

土患病身故恐伊弟等聞知怠於緝犯是以暫未諭知以期速獲

等語所辦非是瑪克蘇爾袞布羈留灌縣地方距該土司住寨不

遠旣經患病卽當就近遣令歸巢迨其已死更應將其身屍發還

查明應襲之人令其襲職方合正理乃明亮等意欲匿不令知殊

失撫馭番夷之道郭羅克賊番殺害禮塔爾一案業經拏獲數犯

正法且土司瑪克蘇爾袞布扣留內地已將四月今又病故亦足

以償禮塔爾之命所有未獲兇犯卽可毋庸勒緝原派督緝之官

弁等俱著撤回朕辦理庶務惟以光明正大爲主卽待邊圉番人亦示以至誠不肯稍存歧視明亮文綬桂林及松茂道查禮所辦殊屬錯謬俱著交部議處其郭羅克土司卽著瑪克蘇爾衮布之子承襲仍令明亮等將此旨曉諭該番○乙巳諭陝西民屯租糧草束屆輪免錢糧之年一體蠲免○以宋豐綬爲陝西按察使

由漢

興道

○己酉諭各督撫所屬總兵官五年密奏一次○恩免庫車

沙雅爾二城伯克等額糧○癸丑諭軍機大臣等海成奏據新昌縣民王龍南呈首舉人王錫侯刪改康熙字典另刻字貫實爲狂妄不法請革去舉人以便審擬等因一摺朕初閱以爲不過尋常狂誕之徒妄行著書立說自有應得之罪已批交大學士九卿議奏矣及閱其進到之書第一本序文後凡例竟有一篇將 聖祖

世宗廟諱及朕御名字採開列深堪髮指此實大逆不法爲從

來未有之事罪不容誅卽應照大逆律問擬以申國法而快人心
乃海成僅請革去舉人審擬實大錯謬是何言耶海成旣辦此事
豈有原書竟未寓目率憑庸陋幕友隨意黏籤不復親自檢閱之
理況此篇乃書前第十葉開卷卽見海成豈雙眼無珠茫然不見
耶抑見之而毫不爲異視爲漠然耶所謂人臣尊君敬上之心安
在而於亂臣賊子人人得而誅之之義又安在國家簡用督撫厚
給廉俸豈專令其養尊處優一切委之劣幕並此等大案亦漫不
經意朝廷又安藉此輩尸位持祿之人乎海成實屬天良盡昧負
朕委任之恩著傳旨嚴行申飭至王錫侯身爲舉人乃敢狂悖若
此必係久困潦倒胸多牢騷故吐露於筆墨其平時所作詩文尙
不知作何訕謗此等悖逆之徒爲天地所不容故使其自行敗露
不可不因此徹底嚴查一併明正其罪著海成卽速親身隨往該

犯家內詳悉搜查將所有不法書籍字迹卽行封固進呈若再不詳查或有隱飾是與大逆同黨矣一面選派妥幹大員將該犯王錫侯迅速鎖押解京交刑部嚴審治罪務於十一月內解到其犯屬應行緣坐之人亦著查明委員分起解京仍飭該員等沿途小心管押防範如途中或有疏虞致令自戕及免脫等事恐海成不能當其罪也至書中所有參閱姓氏自係出貲幫助鐫刻之人槩可免其深究朕於諸事不爲已甚此亦一端也至所有書板及已經刷印本及翻刻板片均著卽行解京銷毀將此由六百里傳諭海成並於各督撫奏事之便諭令知之○甲寅調雅德爲工部侍郎以喀甯阿爲刑部侍郎由刑部員外郎遷○乙卯理藩院奏額敏和卓郡王爵應令伊子降等承襲得旨額敏和卓郡王爵雖應降等承襲但額敏和卓前在軍營甚爲出力著加恩令伊子素賚瑞仍襲

郡王○庚申設密雲副都統一駐防兵二千○定京營兵丁三年
考驗例○諭磨勘鄉會試詩句失粘試卷北省及邊省寬限十年
十一月癸亥朔諭軍機大臣等高晉奏請將武闈二場舞刀改用
烏槍以中靶之多寡分別字號考試一摺所奏不可行國家武鄉
會試之設原以文武制科相沿舊例不但舞刀一項全無實際其
開弓掇石又何獨不然卽伊等之騎射亦難盡期有用且向來用
兵時何嘗仗此項武舉臨陣克敵耶至烏槍一項原係制勝要器
而民間斷不宜演習多藏卽如山東逆匪王倫聚眾之事幸羣賊
不諳放槍易於剿滅此顯而易見者前因民壯內有烏槍手恐日
久或致滋事會諭令各督撫不動聲色將烏槍改爲弓箭所降諭
旨甚明高晉豈遂忘之耶若如高晉所奏武科改用烏槍考驗準
頭則應試之武生勢必時常習學打靶凡應禁之火藥鉛丸俱難

禁民間私相售賣且一縣中添無數能放鳥槍之人久而傳習漸多於事實爲有礙高晉雖意在覈實而未計及其流弊將無所底止所謂知其一未知其二高晉久任封疆尙屬歷練曉事何此奏不達事理若是耶所奏斷不可行不必復交部議將此諭令知之○乙丑禮部議奏義夫貞女例准請旌建坊歷年來各省題報義夫旣不槩見貞女係夫亡守志循例辦理至幼年聘定彼此隔絕經數十載之久守義懷貞各矢前盟卒償所願者實從來所未有今據大學士管兩江總督高晉奏稱山陽縣監生程允元與直隸平谷縣劉氏締姻後隔絕五十餘年各守前盟終偕伉儷事奇理正應請旌表給銀共建一坊以獎節義從之○丙寅諭本日句到朝審情實官犯內蘇爾德廣德二犯朕詳覈案情蘇爾德於黃邦甯往商泰廷基在寓自縊一事其移屍入監捏報病斃之處雖眾

供謂其意出於蘇爾德但黃邦甯已死果否係蘇爾德授意無可
質訊卽使其說果倡於蘇爾德而蘇爾德僅係藩司事非爲政黃
邦甯彼時見署臬司監獄案犯乃其專責若黃邦甯稍知持正不
以所言爲然蘇爾德豈能獨行己見是其罪究以黃邦甯爲重黃
邦甯先經正法蘇爾德尙可姑寬所謂罪疑惟輕是以未旬至廣
德身爲臬司原有奏事之責如以熊學鵬問擬奏廷基罪名過重
卽應不盡題或就所見據實上聞乃旣不直情陳奏惟與熊學鵬
嘵嘵辨論立意沽名及兩次傳旨詢問則妄稱當日原說該問死
罪迨鞫交刑部審訊眾供確實乃吐實情仍以巧辭掩飾其心實
不可問於情理均難輕恕是以句決案冊俱在其應決應寬之故
較然不爽朕於句到招冊必詳閱再三輕重權衡悉視其人之自
取著明白宣諭使眾共曉且使凡爲臬司者知法紀所在不可絲

毫罔上行私如廣德之自取罪戾若心以爲督撫所定策不協於理不妨據實直奏不可自居務寬之名而歸其過於督撫徒稱自不得主張自欺欺人其孰信之將此通諭中外知之○丁卯諭軍機大臣等從前令各督撫於學政差滿時將是否不愧師儒之席及僅係循分供職或有通曉吏治堪勝道府兩司者各就所見秉公密奏見在各督撫陸續奏到之摺雖尙屬公富但恐行之日久學政等以三年報滿其堪勝外任與否由督撫覈舉或有不妥義命之人竟因此逢迎督撫以圖保薦轉不免有流弊且學政復命召見時其人之才具見識可否外用皆可一一鑒別更無藉督撫等多此一舉也著傳諭直省督撫嗣後學政差滿止將其在任考試聲名若何辦事若何據實具奏其能否勝任道府兩司之處毋庸奏及○戊辰諭軍機大臣等前因郝碩辦理金川軍需奏銷事

件其經手一股雖已覈完而各案內多有部議駁查之款均須登
答其山東巡撫印務見有國泰護理是以諭令郝碩侯覆覈全完
再行起程前赴新任昨江西巡撫海成奏民人王瀧南首告舉人
王錫侯編字貫一書詆斥字典海成僅請將王錫侯革審經朕披
閱其書凡例內竟有一篇將 廟諱御名槩行排寫此非大逆而
何乃海成尙稱其書並無悖逆之語實堪駭異此篇卽在首本序
文後之凡例開卷卽見豈得諉爲不知海成係滿洲世僕經朕加
恩簡任巡撫乃於此等大逆之書恬不爲怪且稱其語無悖逆實
屬昧盡天良負恩蔑理莫此爲甚因交部嚴加議處今據吏部議
請將海成革職交刑部治罪所議甚當海成革職外應有餘罪豈
可照尋常案件留任令其復玷封疆江西巡撫應卽開缺但海成
覆奏之摺見在未到是以將吏部本暫留俟其奏到時再行明降

諭旨而江西省藩臬兩司同辦此案其處分均重將來亦難姑寬是該省並無可護印之員所有江西巡撫員缺著郝碩調補郝碩係朕素知之人江西省又有應辦之事且不必來京請訓著傳諭郝碩接奉此旨卽由川省馳驛迅速赴江西新任並查此案辦理本省公論以爲何如其經手之軍需各案初稟已經辦完卽或部駁條款尙須覈覆見有富勒渾等在彼均可逐一覆查代爲登答原可不專恃郝碩一人也郝碩到江西若海成尙無明旨卽將此旨與彼看將伊革職差人送京此旨著由六百里發往並諭富勒渾等知之○壬申諭余文儀久任刑部歷練老成昨歲刑部尙書缺出特由巡撫擢用俾效所長茲以老疾乞休情詞懇切著照所請准以原品致仕並加恩賞給太子少傅銜以示優眷○甲戌諭前因海成奏新昌縣舉人王錫侯妄作字貫一案海成將大逆不

法之處視爲泛常摺內稱其尙無悖逆詞句全不知有尊君親上之義是以降旨將海成交部嚴加議處經吏部議以革職交刑部治罪自應如此辦理因將此本折留今據海成奏稱親往該犯家中查出王錫侯纂輯各書共十種一併進呈檢閱各書俱有悖謬不法之處各等語見將各書暫存俟王錫侯解到時嚴行審訊從重治罪至海成身爲巡撫乃於初次參奏王錫侯字貫時並不將伊書內大逆不法之處據實覈出轉稱其尙無悖逆之詞實屬昧盡天良罔知大義不可不重加嚴懲以爲封疆大臣喪良負恩者戒海成著照部議革職交刑部治罪其江西巡撫員缺著郝碩調補卽赴新任所遺山東巡撫員缺卽著國泰補授郝碩未能卽到著高晉前往暫管巡撫事務其江西省承辦此案之藩臬兩司並著高晉查明參奏至海成此次奏到續查出王錫侯字貫另本前

有李友棠古詩一首李友棠身爲卿貳乃見此等悖逆之書尙敢作詩讚美實屬天良已昧伊自問復何顏忝列搢紳李友棠卽著革職亦不必復治其罪又查其王氏家譜內有原任大學士史貽直序文其經史竟及唐人試帖詳解內有加尙書銜錢陳羣序文使伊二人尙在自當向其究問今二人俱已物故亦毋庸深究朕近作詩有不爲已甚去已甚之句今辦此等案準酌得中卽此意也將此通諭中外知之○調袁守侗爲刑部尙書以梁國治爲戶部尙書轉董誥爲戶部左侍郎以劉墉爲戶部右侍郎由內閣學士遷○乙亥諭徐恕見在將屆服闋著署山東布政使俟服滿再行實授○諭江西按察使員缺著德文補授該省藩司白瀛見在四川辦理奏銷尙未到任卽著德文速行前往署理布政使印務其按察使印務著高晉於通省道員內揀選一員奏明暫署○丙子諭前

日披覽四庫全書館所進宗澤集內將夷字改寫彝字狄字改寫敵字昨閱楊繼盛集內改寫亦然而此兩集中又有不改者殊不可解夷狄二字屢見於經書若有心改避轉爲非禮如論語夷狄之有君孟子東夷西夷又豈能改易亦何必改易且宗澤所指係金人楊繼盛所指係諸達更何所用其避諱耶因命取原本閱之則已改者皆係原本妄易而不改者原本皆空格加圈二書刻於康熙年間其謬誤本無庸追究今辦理四庫全書應鈔之本理應斟酌妥善在謄錄等草野無知照本鈔謄不足深責而空格則係分校所填既知填從原文何不將其原改者悉爲更正分校覆校俱係職官豈宜失校若此至總裁等身爲大臣於此等字面尤應留心細勘何竟未能逐一校正其咎更無所辭非他書總校記過者可比所有此二書之分校覆校及總裁官俱著交部分別議處

除此二書改正外他皆有似此者並著一體查明改正並諭該館臣嗣後務悉心詳校毋再輕率干咎○丁丑增設四川潼縣營遊擊改建武營遊擊爲都司○壬午諭各省將軍均戴用花翎著爲令○乙酉諭昨據勒爾謹奏河州邪教匪犯王伏林等聚眾念經畧牧前往查拏該犯拒捕傷差當卽督率司道等帶領官兵前往剿捕隨將其四教主石忠信教師郝天祥等拏獲本日又據奏稱官兵併力剿捕生擒匪犯五百二十二名其爲首教主王伏林張志明王九兒均經殲斃見將生擒各犯帶赴省城嚴審分別定擬等語此案匪犯等設立邪教豎旛念經聚集多人敢於顯抗官兵實爲不法已極該督一聞該畧州稟報卽親往該處帶同文武飛調官兵直抵該犯巢穴奮力剿戮一日之內已將逆眾就擒渠魁殲殄所辦甚爲妥速勒爾謹及李本蔣全迪西德布等俱著交部

議敘其餘在事員弁或尙有出力者著該督查明具奏一併交部
議敘至摺內所稱把總楊化祿勇往被傷殊堪嘉尙俟其調理痊
愈時卽行送部引見或因傷重身故亦奏明交部照陣亡例議卹
又諭河州逆匪王伏林等設立邪教惑眾造逆事體甚大若辦理
不合機宜則賊黨蔓延地方受害勒爾謹聞信卽親自馳往將探
信賊匪擒獲七名旋卽領兵將賊匪生擒五百餘名甚屬可嘉著
將朕所用珊瑚朝珠一盤大荷包一對小荷包四對發往賞給以
示嘉獎○丁亥諭朕恭閱 世祖章皇帝實錄內載總河楊方興
奏稱山東滿家洞界連四縣穴有千餘周回二三百里自明季荒
亂頻仍窮民羣聚其內分布四面各數十里節經訓集官兵剿捕
數年乃得悉平等語國家承平百有餘年民人皆安居樂業自不
應有山澤藏奸之事但前此王倫一案卽有未獲要犯焉知不匿

迹深山倖逃顯戮不可不留心查察所云滿家洞連界四縣其地跨連不小究係在何四縣地方無難詢問至洞內見在有無人家居住及所有洞穴近日形勢若何是否可以藏匿奸人亦當實力體訪著傳諭國泰卽密遣妥員前往該處查明據實具奏毋得稍涉張皇所有楊方興原奏並著鈔寄國泰閱看尋奏滿家洞古名迷山周回六百里在嘉祥縣界內南距金鄉界五里西距鉅野界八里東距濟甯界十八里北至嘉祥縣城五十里山腰大石層疊有廢洞口五處俱係用石塊堵塞洞口石色黃赤詢係國初平定土賊時會用火攻石經火鍛摧裂坍塌隨刨開石塊入內探驗寬約丈餘俱有大石塊堵塞亦不通連別處山前有千總一員駐紮足資巡查實無藏匿奸匪之事謹繪圖呈奏得旨圖留覽○庚寅定綠營武職保薦後軍政降入平等者不准升用例

十二月己酉命閒散宗室移駐盛京大凌河馬廠西北松山杏山
地方○吏部奏署江西布政使賴南道周克開按察使馮廷丞閱
看王錫侯字貫一書不能檢出悖逆重情竟同聲附和有乖大義
應請革職交刑部治罪其失察妄著書籍之大學士管兩江總督
高晉照例降級留任得旨周克開馮廷丞俱著革職交刑部治罪
高晉著降一級留任○乙卯諭據徐績奏司道等官賢否考語摺
內稱按察使趙銓人尙謹飭微覺健忘辦理一切案件精神不能
周到等語臬司爲通省刑名總匯趙銓旣已健忘精神又不能周
而豈可仍任臬司致滋貽誤公事趙銓著以原品休致至徐績旣
知該臬司不能勝任自應據實具奏勒休另請簡員補放乃僅於
屬員賢否單內聲註而於該臬司應去應留不置一辭殊屬非是
徐績著交部嚴加議處○丙辰以鄭源璿爲河南按察使

由福建汀漳龍

道

○己未諭軍機大臣等前因勦捕河州逆匪王伏林一案勒爾

謹所奏殺賊情形及副將西德布是否勇往均未詳悉諭令明駢
奏覆今據勒爾謹奏稱西德布打仗甚屬勇往親用刀箭殺賊十
一名又見王伏林仗劍誦呪即用箭射倒等語西德布已令送部
引見俟臨時再降諭旨至所稱王伏林射倒後隨有馬兵謝崇文
用刀砍斃見已記名遇有外委缺出拔補等語殊屬非是王伏林
係逆惡渠魁罪應寸磔既經射倒不復防其抵禦自應即將該犯
生擒嚴訊務得此案確情然後明正刑誅以昭國法方爲正辦且
王伏林若經西德布中其要害立時斃命理所宜然射者仍有功
而無過至已經射倒之賊復加刀砍誰則不能非但不能言勇而
適形其懦且令碎磔之犯倖得全屍足見謝崇文之懵懂無能並
非若從前直隸兵丁穆維在山東奮勇殺賊者可比此等綠營惡

習朕所痛恨卽如前明用兵不惟其君卽所謂本兵與經略總督亦不能察此等積弊賞格濫施以致無所勸懲卒受其害邇年來出兵征勦深有鑒於勝國之弊凡庸懦邀功者槩不得與冀稍挽回綠營風氣今勒爾謹將該兵丁記名拔補徒令懦兵售碌碌因人之術使各營相率效尤軍政尙可問乎勒爾謹所辦太不曉事著再傳旨申飭將此由四百里傳令知之○庚申建熱河考棚○辛酉諭軍機大臣等據朝鮮國王奏該國有逆臣洪麟漢等結黨謀逆一案罪人業經伏法恐其支黨實繁或有逃匿漏網者懇敕關口官員查拏等因一摺該國臣服多年素稱恭順今該國王旣恐有餘黨潛逸之事自應代爲查詰不容竄入內地著諭盛京將軍弘昫山東巡撫國泰於盛京山東地方與朝鮮接界邊隘海口嚴飭所屬留心察詰如有語言形迹可疑查係朝鮮人民卽行盤

獲奏聞發交該國自行究治該將軍巡撫務實力妥辦毋得視為具文○是歲朝鮮來貢

東華續錄

乾隆八十七

臣王先謙敬編

臣周瀚蕃恭校

乾隆四十三年戊戌春正月癸亥命各省軍流人犯已過十年者奏請省釋其不願回籍者聽○召徐績來京以鄭大進爲河南巡撫李本爲貴州布政使譚尙忠爲甘肅按察使服闋廣東按察使○辛未諭睦親彰善王政宜先繼絕昭屈聖經所重朕自臨御以來閒日恭閱列祖列宗實錄一冊因備知祖宗創業艱難及爾時懿親懿臣勤勞佐命底定中原偉伐殊功實爲從古所未有而當時策勛錫爵榮號崇封所以酬答者本從優厚迨其後或有及身緣事旋被降削者或有子孫承襲更易封號者迄今平情準理若不爲之溯述闡揚追復舊恩於心實有未愜因念睿親王多爾袞東華續錄

當開國時首先統眾入關靖蕩賊氛肅清宮禁分遣諸王追戮流寇撫定疆陲一切創制規模皆所經畫尋卽奉迎世祖車駕入都定國開基以成一統之業厥功最著願以攝政有年威福不無專擅諸王大臣未免畏而忌之遂致歿後爲蘇克薩哈等所構授款於其屬人首告誣以謀逆經諸王定罪除封其時我世祖章皇帝實尙在冲齡未嘗親政也夫睿王果萌異志則方兵權在握何事不可爲且吳三桂之所迎勝國舊臣之所奉止知有攝政王耳其勢更無難顯竊名號卽我滿洲大臣心存忠篤者自必不肯順從然彼誠圖爲不軌無難潛鋤異己以逞逆謀乃不聞於彼時因利乘便直至身後以歛服僭用明黃龍袞指爲覲覲之證有是理乎况英親王阿濟格其同母兄也於追捕流賊回京時誣報李自成身死且不候旨班師睿王卽遣員斥責其非並免王公等

往迎之禮又因阿濟格出征時脅令巡撫李鎰釋免逮問道員及
擅至鄂爾多斯土默特取馬令議其罪降爲郡王平日辦理政務
秉公持正若此是果有叛志無叛志乎又 實錄載睿王集諸王
貝勒貝子公大臣等遣人傳語曰今觀諸王貝勒大臣但知諂媚
於予未見有尊崇 皇上者予豈能容此背 太宗升遐嗣君未
立英王豫王跪請予卽尊位予曰爾等若如此言予當自刎誓死
不從遂奉 皇上繼承大統似此危疑之時以予爲君予尙不可
今乃不敬 皇上而媚予予何能容自今以後有盡忠 皇上者
予用之愛之其不盡忠不敬事 皇上者雖媚予予不爾宥也且
云 太宗恩育予躬所以特異於諸子弟者蓋深信諸子之成立
惟予能成立之每覽 實錄至此未嘗不爲之墮淚則王之立心
行事實能篤忠盡感 厚恩深明君臣大義尤爲史冊所罕觀使

王彼時如宋太宗之處心積慮則豈肯復以死固辭而不爲邪說
搖惑耶乃令王之身後久抱不白之冤於泉壤心甚憫焉假令當
時王之逆蹟稍有左驗削除之罪果出於我 世祖聖裁朕亦甯
敢復翻成案乃實由宵小奸謀搆成冤獄而王之政績載在 實
錄者皆有大功而無叛逆之蹟又豈可不爲之昭雪乎昨於乾隆
三十八年因其塋域久荒特敕量爲繕葺並准其近支以時祭埽
然以王之生平盡心王室尙不足以慰彼成勞朕以爲應加恩復
還睿親王封號追諡曰忠補入 玉牒並令補繼襲封照親王園
寢制度修其塋墓仍令太常寺春秋致祭其原傳尙有未經詳敘
者並交國史館恭照 實錄所載敬謹輯錄增補宗室王公功績
傳用昭彰闡宗勛至意又如豫親王多鐸從睿親王入關肅清京
輦卽率師西平流寇南定江浙實爲開國諸王戰功之最乃以睿

王之誣獄株連降其親王之爵其後又改封信郡王雖至今承襲罔替但以王之勛績超邁等倫自應世胄原封以彰殊眷豈可以風影微眚輒加貶易乎朕以爲應復其原封又諸王中披堅執銳拓土開疆共成一統之業者如禮親王代善後改封康親王鄭親王濟爾哈朗後改封簡親王肅親王豪格後改封顯親王克勤郡王岳託後改封平郡王當時俱茂著壯猷克昭駿烈載在宗盟今其子孫所襲均非始封之名外人不知妄疑宗藩當國家締造時有大勳勞而後裔均不得長延帶礪以爲闕典卽其本支承家襲慶以去祖漸遠幾忘其先世錫封之由弗克顧名奮效所繫於宗室子孫者甚重况功臣世封內如揚古利之英誠公費英東之信勇公額亦都之果毅公俱以本號相傳其子孫承襲者各能溯勛閱以宣偉績不失故家喬木之遺今以親賢世胄竟改其初封嘉

號何以垂貽奕禩示酬庸追本之義乎朕以爲應復其原號著交
軍機大臣會同宗人府悉心妥議具奏其餘宗室諸王貝勒等如
有顯著功績其封爵後經降奪者除本身身罹重愆自不當復邀
優典若係承襲之子孫獲咎議處者僅當斥其本身而不當追貶
其祖宗世爵方爲平允亦著一併會查議奏再配享 太廟諸王
僅有通達武功慧哲宣獻四郡王其 太祖 太宗 世祖時戮
力行間櫛風沐雨之親藩如向所舉數人皆未之及蓋由當時議
禮諸王各懷私意遂爾沒其勛伐不得同侑馨香豈足以彰公道
所有睿親王禮親王鄭親王豫親王肅親王克勤郡王著補置牌
位配享 太廟用以妥功宗而昭渥典至通達郡王係 顯祖之
子武功慧哲宣獻三郡王係 景祖之子當時雖身與配享第以
三郡王宗支已在覺羅之列是以宗室王公表傳內未經列傳但

思宗室傳既限於支派國史傳又以屬在宗潢令此四王無所附麗亦覺欠缺著並交國史館查明四王事實補爲立傳列於國史諸大臣傳之前卽或當時紀載簡少功績無由稽覈無妨不拘詳略各立一傳以徵信實並將此通諭知之○諭故超勇親王額駙策凌朕曾施恩令其配享太廟列入西廡策凌係蒙古親王固倫額駙在軍營多立功績著加恩將策凌牌位移列東廡怡賢親王之次○諭信勇公費英東當我朝創業時首先率所部來歸繼從太祖征勦諸部屢挫明兵厥功最大實與揚古利額亦都同爲開國勲臣之冠自應並錫上公用彰渥報乃揚古利原封一等公額亦都僅得二等公經朕晉封一等而費英東子孫所襲尙係三等公爵不足以昭酬庸茂典著加恩晉封爲一等公俾元勲世胄永膺茂賞至向來后族承恩世爵俱係一等公此等特因椒房

至戚恩澤加封其與佐命功臣櫛風沐雨拓土開疆者實難並論况宗室王公之以近支恩封者尙以世次遞降而外戚轉得以崇封延世未免過優著將所有承恩公爵俱改爲三等公世襲罔替著爲令○王申命省釋新疆軍流人犯其已過十年衰病不任耕作者回籍○甲戌諭 皇祖第八子允禩第九子允禔居心險詐結黨妄行罪皆自取 皇考尙不忍重治其罪僅令削除譜牒更改其名以示愧辱就兩人心術而論其潛蓄覬覦竊竊之謀誠所不免及 皇考紹登大寶伊等怨尤誹謗亦屬情事所有蓋伊兩人未嘗無隱然悖逆之心特未有顯然悖逆之蹟是以 皇考雖明暴其罪狀猶爲曲示矜全 聖心如日在天固眾所共仰也迨皇考晚年屢向朕諭及此事輒愀然不樂意頗悔之若將留以有待者朕卽位之初深有念於孔子三年無改之言未敢遽易成

案今臨御四十三年矣近降旨復睿親王封爵及仍給還功績諸王原封爵號因念宗藩遠派旣爲覈實酬庸而近屬本支豈宜略而不辦此事重大朕若不言後世子孫亦無敢言者所有允禩允禔二人自不合還其原爵仍當復其原名收入 玉牒兩人子孫亦當一併敘入並著軍機大臣會同宗人府查明應入支派列譜呈覽朕此舉實仰體我 皇考當日仁心以申未竟之緒諒 皇

祖 皇考在天之靈亦當愉慰也又弘皙在乾隆初年曾獲罪戾經承辦之康親王等奏請削其原名閱今亦三十餘年矣念其所犯更非必不可原之罪且其子姓見列宗圖何必獨令其削名示貶弘皙亦著於 玉牒內復其原名則 皇祖一派天潢牒圖具列益昭麟趾燕貽之盛朕亦惟揆情度理悉準以大公至正之心而已將此通諭知之○乙亥諭朕覽 實錄載英親王阿濟格秉

心不純往追流賊謊報已死又擅至沿邊索馬且向巡撫屬託公
事過蹟昭著雖前此亦有微功究不足以抵其罪黜爵實由自取
至其子孫前俱降爲庶人削其宗籍 皇祖御極之初曾加恩將
伊次子傅勒赫復還宗支追封公爵遞襲其餘諸子仍行除籍嗣
於康熙十二年復蒙 恩將伊第三子伯爾遜第八子佟塞第十
子鄂拜第十一子班進泰各支賜給紅帶子附入 玉牒今思傳
勒赫一支旣已作爲宗室襲爵其有後之伯爾遜等各支及無後
之和度等同係英親王之子孫似毋庸復爲區別因推廣 皇祖
恩意著交宗人府一體查明復還黃帶子列入宗譜○諭熱河地
方朕每歲木蘭秋獮先期駐蹕數十年來戶口日增民生富庶且
農耕蕃殖市肆殷闐其秀民蒸蒸向化絃誦相聞見已興建學校
議定庠額並命設立考棚將來人文日盛儼然成一大都會而稱

名尙仍熱河之舊殊於體制未協因思熱河從前曾稱爲承德州嗣後應改爲承德府卽以熱河同知改設其餘六廳如八溝較大應改爲知州喀喇河屯等廳酌量改縣均隸新設之承德府管理並隸熱河道考覈著交總督周元理將應行酌改事宜悉心籌畫妥議具奏○丙子諭軍機大臣等前因緬匪業經迭出蘇爾相其事已完且有納貢還人之說見更無可辦惟當嚴查關隘勿使奸民等出入偷漏等因已屢諭李侍堯遵照妥辦昨李侍堯奏緬夷自懜駭死後內訌外讐日無休息等語緬酋贅角牙新襲父職其親屬鄰疆彼此搆爭或所不免卽果有其事亦止可置之不問蓋乘人之亂理本不順且緬甸氣候水土並皆惡劣實非可用武之地朕籌之已熟斷不宜以我有用之將士輕爲嘗試是以決計不復於緬甸加兵卽使蠻觸自鬪竟至內潰外侵有隙可抵而其天

時地利並無改易豈可因此輕舉妄動耶且緬匪梗化多年近既知送還蘇爾相尙稍有悔罪之心亦可藉以完從前之局若此時並將楊重英送出遣使納款進貢固屬甚善自應卽行奏聞加恩准其開關通市設仍冥頑不悟並不獻出楊重英亦於事無關輕重止須付之不理賊匪自無從揣測惟緬境既有內亂之事或其頭人等有脫出來投者不妨槩行收留一面具奏請旨彼既未獻楊重英等更不得怨我之納彼逋逃况並育兼容矜撫窮困乃天朝一視同仁之道理所宜辨李侍堯當隨時酌量妥爲之至於嚴查關隘一節實爲馭邊最要之事李侍堯惟當董飭所屬實力詰查勿使內地奸民及沿邊猺夷等一人出入致探洩事機偷漏貨物庶令緬匪稍知窘畏此專責之李侍堯務須善體朕意始終如一不可任屬員日久玩愒有名無實諒李侍堯必不掉以輕心致

負委任也將此由六百里傳諭知之仍將緬匪近日情形所謂內
訐外讟者何事有無信息卽行覆奏○丁丑宗人府軍機大臣等
議奏睿親王等爵號事宜一睿親王多爾袞本無子嗣從前曾將
豫親王之子多爾博承繼爲嗣後因定議罪案業令歸宗今睿親
王旣復宗支應仍令多爾博一支繼嗣所復睿親王爵卽令多爾
博之四世孫溥穎承襲罔替至溥穎承襲之公爵毋庸另襲其親
王應設佐領及護甲等項並交該衙門照例議辦其應補入玉
牒之處卽查明補入並交國史館將所著功績於原傳添敘其園
寢交該衙門照親王例勘估改葺春秋致祭一豫親王多鐸應遵
旨追復親王還號爲豫一體配享太廟其豫親王爵卽令見襲
信郡王之修齡承襲亦世襲罔替其應添改護衛等項交該衙門
照親王例辦理一禮親王等原封爵號應永紹嘉名勿令改易所

有見襲之康親王應復號爲禮親王簡親王復號爲鄭親王顯親
王復號爲肅親王平郡王復號爲克勤郡王至改復舊號之親王
郡王止就見在襲爵者爲始永遠遵循其從前原襲已故之康親
王等封號俱無庸追改一通達武功慧哲宣獻四郡王應請交國
史館查明事實各補列傳一睿親王追復原封並令世襲信郡王
改復豫親王均應照例另給冊寶至康親王改復禮親王簡親王
改復鄭親王顯親王改復肅親王平郡王改復克勤郡王其原給
寶文印文交禮部改鑄其冊內止須將奉旨年月及改復封號增
鐫毋庸另製一禮親王睿親王鄭親王豫親王肅親王克勤郡王
見俱配享 太廟所有東廡序次禮親王應在宣獻郡王之下睿
親王等五王以次序列從之○己卯 上啓鑾謁 泰陵 泰東
陵○免經過地方本年額賦十分之三○癸未 上謁 泰陵

泰東陵○大學士于敏中等奏本月二十三日 孝聖憲皇后大事已屆初週諸皇子及王公大臣等持服期年較從前以日易月之制已屬有加一切悉應如常其服色朝珠及穿用補褂蟒袍日期並嫁娶宴會作樂之處亦俱應如舊得旨本月二十三日 聖母孝聖憲皇后大事業屆初週諸皇子及王公大臣等已滿期年今既經查照舊例一切自應如舊其挂朝珠及穿補褂蟒袍之處以言朝廷禮有常經萬年體制所關宜從此議朕亦不能矯爲過禮至因尊敬朕躬而設則朕於二十七月內尙係素服而臣工服飾如常朕心實有所不忍對之所有王公大臣等如遇朕在宮內及諸臣有事進朝服色俱著照舊如朕駐蹕圓明園非正朝可比隨往及奏事引見之大臣官員仍照上年所議行統俟過二十七月後再行復舊庶爲心安理得餘依議○甲申 上謁 泰東陵

行替年大祭禮回鑾○乙酉以范時紀爲副都統調謝塘爲禮部

左侍郎以徐績爲工部左侍郎

原任河南巡撫

○丁亥 上還京師○己

丑以陳用敷爲湖南布政使調梁敦書爲廣東按察使以塔琦爲

湖南按察使

由江西吉南
賴甯道遷

二月壬辰朔諭 裕貴妃母妃侍奉 皇考誕育和親王淑慎素

著朕御極之初卽欽奉 聖母皇太后懿旨晉封貴妃以申敬禮

之意四十餘年 慈甯隨侍 親愛尤深茲年屆九旬實爲宮闈

盛事宜崇位號以介蕃釐應晉封爲 皇貴妃所有應行事宜各

該衙門察例豫辦屆期獨吉舉行○甲午吏部議准直隸總督周

元理奏熱河地方更定事宜一熱河同知改爲承德府餘六廳擬

改州縣如喀喇河屯廳擬名灤平縣八溝廳擬名平泉州四旗廳

擬名豐甯縣塔子溝廳擬名建昌縣烏蘭哈達廳擬名赤峰縣三

座塔廳擬名朝陽縣一熱河同知向管地方刑錢事務今改爲承德府毋庸添設附郭知縣請如直隸州例刑錢俱自行辦理其六州縣事由該府審轉考覈一口外多係蒙古旗民交涉事務請卽以理事通判管知縣事仍照原銜升轉其該府接見儀注行文體制俱如知縣例從之○丙申軍機大臣等遵旨覆奏查允禩允禔子孫見在圈禁者惟允禔長子弘晷其餘兩家子孫俱係正藍旗官兵看守不准出外行走應將弘晷釋放並撤看守官兵至所有女孫女年長者已嫁未嫁者俱幼報聞○戊戌順承郡王恆昌薨諭多羅順承郡王薨逝著交該部照例辦理仍加恩派散秩大臣一員帶領侍衛十員賞奠茶酒尋予諡曰慎○授宗室允禔長子弘晷爲散秩大臣○己亥諭馮廷丞周克開著加恩發往江南交與高晉以同知委用○庚子諭吏部奏據文選司檢舉署東平州

州同許祖堯夏津縣主簿姚興鳳二員各前任加級之處遺漏未經入冊以致因公降調照例開缺請將承辦司員交都察院察議等語該司員於議處降調之案不查明加級抵銷自屬疏漏但其事與刑部失入相似而實不同刑部失入重於失出者因罪犯一經失入已羅重辟所謂死者不可復生嚴其處分正以重民命也至失出囚卽遣放仍可審覈更正故其議處從輕若吏部辦理議處疏忽失入固有應得之咎但事後尙可自行檢舉或經被議之員控辨仍可查明改正不致終於枉屈其議處可以從輕至失出則以應行議降之人妄爲擬抵安知非徇情受賄高下其手久之易滋流弊不可不重其處分俾知儆惕以刑部出入輕重反而用之方爲平允著吏部會同都察院另行定例具奏此案卽照新例行餘依議尋議吏部辦理議處司員如係徇情受賄將應議實降

之人妄爲議抵應另行參究其一時失檢重複抵銷者如係罰俸降級留任之案舊例罰俸一箇月今應改爲罰俸一年係應行降調之案舊例亦止罰俸一箇月今應改爲降一級留任至遺漏抵銷致本員降調離任者舊例降一級留任今應改爲罰俸一年從之○壬寅諭滿斗蘇爾德應得之罪尙不至死是以朕於上年秋讞俱施恩未勾海成雖擬重罪亦不至死海成滿斗蘇爾德俱著寬免釋放海成著交特成額帶往烏什令在章京上效力行走滿斗著交內務府蘇爾德著交步軍統領衙門俱令在章京上效力行走果能奮勉二三年後再以主事等官補用○丙午諭學校人才之聚郡縣戶口之繫古者教養並重治化覃敷至於荒略之地邊漠之區恆有聲教所未及而不隸版圖者我朝定鼎以來光宅函夏幅員日廓中外一家京畿東北四百里熱河地方在古北口

以北其境於禹貢爲冀州邊末而虞及殷周幽州之盡境也秦漢以來越在絕徼未入版圖北魏建安營二州唐時有營州都督府然不過僑治於內地遼金及元始著其名而厯服未久故址旋荒明棄大甯視爲外域我國家撫臨寰宇溥海內外咸登版籍况熱河密邇畿輔自 皇祖康熙四十二年肇建山莊秋獮經行往還駐蹕 皇考率修 前典設立熱河廳尋改承德州朕臨御之七年地方大吏建議此地究爲關外仍設爲廳八溝等六處悉如之蓋以其時士民稀少風俗椎魯立學建郡之制有未遑焉嗣後獮獵木蘭每歲駐蹕於茲日見黎庶殷闢戶口繁富里巷絃誦人文漸起此實國家積洽累仁休養生息涵濡百餘年之久方克臻斯夫士爲四民之首士著與僑居者久於其化子弟不乏秀良而學校未興師承無自其何以甄陶而鼓勵之况今西域如烏嚕木

齊等處率皆立學校置郡縣以此較彼地既遠近懸殊風土人物亦皆過之按諸古者廣立學校之意其地其時正相協焉爰於丙申秋命冬官量度規模鳩工庀材興建 文廟朕親釋奠而落成之每年來巡幸斯土必先展拜 廟貌秋仲丁祭遣大學士行禮率以爲常所有酌定庠額分年取士並創設書院義學延師訓課悉令督臣與學臣議立章程以行近歲士氓深被教澤旣富方穀益見蕃昌閭閻安堵沐浴太平四方商賈之民駢集輻輳儼然成一都會計其地千餘里而戶口或逾十萬可以見耕桑日闢版籍日繁成都成邑之盛有明徵焉近者旣創立學校樂育人材而其地猶仍熱河廳之舊準諸體制未爲允協因思向曾設承德州今宜升爲承德府卽以同知改設其餘六廳如喀喇河屯廳改爲灤平縣四旗廳改爲興寧縣八溝廳其地較廣改爲平泉州烏蘭哈

達廳改爲赤峪縣塔子溝廳改爲建昌縣三座塔廳改爲朝陽縣
賦稅戶籍之數悉隸於知府轄於熱河道以重考覈官斯土者宜
悉心經畫措置協宜副朕嘉惠邊氓教養兼施之意至於考訂舊
聞蒐羅掌故輯成熱河全志已命儒臣博採旁徵區分事類纂訂
成書仍於山莊內聚建文津閣庋貯四庫全書琅籤秘笈炳耀壑
垣以示朕崇師敦典一道同文至意○己酉諭禮部奏儀制司員
外郎員缺主事內別無合例擬陪之員請以李漱芳題補帶領引
見等語其謬妄實出情理之外李漱芳在給事中任內當山東逆
賊王倫倡亂之初卽奏稱係飢民聚處滋事朕以所言如果有據
則地方官諱災釀亂罪難輕追因諭大學士舒赫德於勦捕賊匪
時留心體訪嗣據舒赫德覆奏細查壽張等縣收成俱八九分且
逆賊初時搶掠各州米豆糧食所在多有則是饑民釀變之說實

係荒唐及賊黨要犯就獲解京命軍機大臣會同九卿科道在刑部公鞫各犯並無供有因災起事者朕集眾親鞫復令李漱芳自向各犯訊問亦無以災對者是李漱芳前奏之妄眾皆曉然伊又附奏直省亦有饑民地方官在盧溝橋攔截不令他往而給事中范宜賓尋襲其說入告因派侍郎高樸袁守侗帶同李漱芳范宜賓前往良鄉及黃村東壩等處並未見成羣乞食流民皆李漱芳等所目擊實無人爲之隱飾也是李漱芳肆意妄言悉屬毫無風采而造作無稽轉欲爲賊捏詞卸過更不知其是何肺腑卽治以袒賊惑眾之罪亦所應得但朕從不肯因言民隱事加罪科道然李漱芳心術如此豈宜復居言路爲世道人心之害至范宜賓係漢軍世僕乃敢妄言干輿其風斷不可長因將范宜賓革職發往新疆辦事效力而李漱芳則從寬以主事改用已屬朕格外加恩

且其事曾經明降諭旨中外共曉永貴豈轉未聞知李淑芳見爲
主事已邀寬典止宜令其黽勉自效以贖前愆豈宜曲爲袒徇復
予升用昨永貴等奏將李淑芳充會試副提調朕以其不過禮部
應辦之差遂行點派孰意永貴等竟以此試探見朕前日允其所
請今卽請將李淑芳升補員外郎並云無合例擬陪之員冀李淑
芳之必得是永貴全不思李淑芳前此之罪由自取一味心存偏
議必欲令其遷官員外之不已勢必復以郎中保題郎中之不已
勢必復行保送御史此乃明季士大夫惡習黨援朋比之風固結
不解馴致國事日壞底於滅亡覆轍可鑒朕惟以 皇祖 皇考
之心爲心以 皇祖 皇考之政爲政勤思湔除積弊力爲整飭
內外臣工亦頗知奉法無明末惡習乃永貴竟敢以此等伎倆巧
爲嘗試其視朕爲何如主乎朕披閱禮部奏摺召見軍機大臣以

其事必係永貴主意及召侍郎阿肅面見不待詢而伊卽稱爲永貴所誤朕因永貴歷任年久是以用爲尙書乃伊見朕屢沛渥恩漸無忌憚惟以沽名取悅爲事前因阿桂養病在家卽請將京察被參人員改補閒職者其降革罰俸之案不令隨帶已屬違例邀譽因交都察院嚴加議處議以革任朕從寬令其留任永貴自揣伊革任註冊之案甚多卽再有處分亦不過如是而止不復心存儆畏茲復敢以此巧售其居心尙可問乎朕於大小臣工革職革任之案俱就其事之輕重斟酌而行或事由公錯或情節稍輕者原皆量予寬免若其獲咎較重及有心弊混者並未嘗濫邀原宥永貴此次之罪非無心錯謬可比豈可復照尋常議處永貴深負朕恩著將所有職任悉行革退並拔去花翎加恩賞給三品頂帶自備資斧前往烏什辦事換綽克托回京永貴至烏什後若仍不

痛改前非實心任事必將伊在彼正法以示炯戒所有隨同列銜具奏之禮部堂官並著交該部嚴加議處李漱芳不准帶領引見其吏部尙書員缺著綽克托調補工部尙書員缺著富勒渾調補禮部尙書員缺著特成額補授毋庸前往烏什朕於大小臣工罪犯惟視其人之自取本不肯有意從嚴亦不肯廢法寬縱悉準以大公至正從不稍存成見內外諸臣皆所深知各宜敬體朕心永副恩遇毋稍徇私干戾著將此通諭中外知之○諭鍾音將侯官縣烈婦黃致中側室鄭氏題請旌表一疏所辨非是夫亡殉節事近輕生曾經皇考降旨停止旌表朕念其究屬節烈故令該部仍照例雙請數十年亦無不仍准旌者至於側室捐軀更非正室可比豈宜槩予闡揚卽如我滿洲舊制凡側室雖生有子女者尙不得與本夫合葬蓋以名分所在不可踰越況此等殉節者安知

非由平昔嫡庶不睦恐日後受正妻陵虐遂以身殉未必盡出於義烈何能細爲分別此等卽多旌數人又何裨於風化耶又疏內稱備小星之位常抱衾裯措詞尤爲失當小星見於召南係屬諸侯之事豈可妄施於民間鍾音係科甲出身夙以文墨自負乃於此等詞句不知檢點別白冒昧引用殊乖入告之體鍾音著交部嚴加議處餘仍著該部議奏尋奏側室非正室可比名分本屬相懸且有未盡出於義烈之處該督所題鄭氏旌表應毋庸議報聞○庚戌諭昨禮部奏將李漱芳指名請補員外郎缺一摺其謬妄實出情理之外朕披閱時以爲必係永貴之意卽向軍機大臣明降諭旨及召見阿肅不待朕詢及卽奏稱爲永貴所誤是永貴之罪萬無可追不得不大示懲創矣李漱芳在給事中任內當山東逆匪王倫倡亂時妄稱係饑民聚眾滋事因交大學士舒赫德訪

查則壽張等縣均有八九分收成及九卿科道會鞠解京各要犯並令李漱芳自向訊問並無供及因災起事者李漱芳之奏竟屬荒唐身爲言官而造作無稽之談爲亂民飾詞卸過其心實不可問卽治以袒賊惑眾之罪亦非過當至所奏直隸流民之事范宜賓亦襲其說朕派高樸袁守侗帶同李漱芳范宜賓前往所指各處細查並未見一饑民皆李漱芳等所目擊使高樸袁守侗稍有徇飾李漱芳等何難據實劾奏朕必治周元理之罪而所言旣虛則無可復辨矣至朕臨御四十三年無時不心周民隱於各省暘雨情形每先期詢問不容督撫等稍有諱匿卽如去歲河南汲淇臨漳等縣秋雨缺少經朕節次諭詢徐績始不能隱諱則徐績實爲玩視民瘼豈復宜封疆之任卽降旨將伊撤回至榮柱爲藩司中明白能事之員其才具實堪勝巡撫因災務係藩司專責榮柱

既未先爲奏及其咎亦無可辭是以河南巡撫不用榮柱而用鄭大進此近日之事眾所共知者而謂朕於督撫等之膜視民生休戚肯稍爲寬假乎卽以此問之李漱芳伊亦當無可置喙朕前此將李漱芳改用主事已屬量從寬典而其人在部朕豈不復記憶使其果應升用亦應俟朕特旨加恩豈堂官等所當設法保奏巧爲嘗試乎若云爲缺起見則禮部司員除李漱芳外豈無應升員外之人與其違例保奏李漱芳何如將見出倉差之主事揀選一人專摺陳請卽斷無可題之員亦何妨咨明吏部改歸銓選尙何所藉口乎我朝綱紀肅清 皇祖 皇考至朕躬百餘年來皆親攬庶務大權在握威福之柄皆不下移實無大臣敢於操竊卽或瞻徇情面於小事偏護一二人亦所不免從未有似永貴之逞其私智於用人大端公然擅干者永貴之意不過以李漱芳因言事

獲譴伊爲保題升用眾必以彼爲正人此乃明季黨援惡習朕仰
體 皇祖 皇考之心力爲整飭臣工等漸知奉公守法不敢輕
蹈覆轍永貴何人朕何如主而欲妄施此等伎倆能乎不能永貴
此舉其是非曲直顯而易見若欲因此邀譽眾卽予以正直之名
能乎不能從前孫嘉淦在 皇考時因管國子監必欲保一屬員
妄行爭執 皇考立將伊拏問治罪今朕僅將永貴革退職任仍
賞三品職銜自備資斧往烏什辦事尙屬朕格外施恩外聞卽有
無識之徒妄肆議論權其輕重朕不懼也卽令永貴撫心自責能
不感激愧懼乎昔趙普補牘之事亦因其與宋太宗同謀竊取神
器故敢徑情直遂宋太宗亦遂勉強曲從永貴係滿洲世僕由司
員經朕屢加拔擢豈得自比於趙普而朕勵精圖治事悉親裁實
不肯自比於宋太宗若大臣欲干政務惟所欲爲此前明庸懦之

君則然我大清 列聖相承朕敬承 先志方以整綱飭紀爲務
豈容大臣等之行私藐法乎昨懲治永貴之故及朕不肯令督撫
等諱災之故恐眾尙未能共悉著再明白曉示通諭知之○戶部
議駁山東巡撫國泰奏社倉穀石其春借秋收俱交地方官經理
並於歲底令州縣赴四鄉盤查等語查社倉出納支收例應社長
典司其事若由地方官經理盤查難保無累於民所奏應毋庸議
得旨部駁甚是依議國泰此奏似是而非若如國泰所言收支出
納俱歸有司經理是在官又添一常平倉矣從來有治人無治法
卽如朱子立法之始因所居崇安有社倉與本鄉士人司其斂發
由朱子人本公正且行之一鄉故有利無弊使朱子爲郡守未必
能令各縣悉皆實力奉行况推而行之天下乎如國泰所陳社長
瞻徇侵漁諸弊原不能免然因此而官爲經管則胥役地保之藉

端勒索煩擾更甚是欲除一弊而又滋一弊也惟當仍照舊定章程各督撫飭屬用心稽覈勿使里社侵虧中飽期得實濟何必輕事更張耶將此通諭知之○壬子以特成額爲成都將軍鍾音爲禮部尙書調楊景素爲閩浙總督以桂林爲兩廣總督山四川提督遷○甲寅諭本日刑部議覆郝碩所奏定南廳逆倫重犯胡震泰案內同謀加功之葉觀菴受等擬以絞決已依議行矣向來外省蔑倫之犯舊係立斃杖下從不具奏立案朕以此等逆犯實爲覆載所不容自當明示誅磔以快人心而申國法因令於審明時卽請王命正法仍一面奏聞定例以來每歲所奏間有一二案朕閱畢俱不批發蓋逆犯性同梟獍固天地閒戾氣所鍾乃竟至於悖理蔑倫實非世閒所宜有故不欲復汚丹毫然究係教化未周致惡類不能盡絕我君臣皆當引以爲愧從來道政齊刑不如德禮明刑

卽所以弼教辟以止辟原屬不得已而用之各督撫以至州縣誠能於人心風俗之原詳加化導未嘗不可以感發天良潛消乖戾然亦貴乎誠意相孚非徒爲條教具文虛言塞責而已至於旌獎節義不過王政之一端非卽藉此遂足以維持世道上年高晉等請旌山陽縣守義之程允天夫婦亦僅爲眾所樂道近日鍾音請旌侯官縣民黃致中側室鄭氏殉節尤不值槩予闡揚又前此召見曹秀先奏近日各省題旌節婦較少於前其意若有未慊者所謂知其一未知其二守節本閨門庸行多出於殷實之家足衣食而惜顏面自不肯輕於改適雖多亦無足爲異且節婦卽多千餘亦不抵偶有一逆倫之犯若以節婦多爲風化之美則逆倫者甯不當有所歸咎曷亦權其輕重而計之乎夫化民成俗乃有司之專責而董率整飭尤大吏之職司乃近來督撫諸事廢弛吏治幾

有不可問者卽如刑部議駁孔傳炯奏請州縣接遞人犯另文移會前途以防竄逸一摺以舊有之章程全未寓目轉作爲己意條奏卽此類推外省於一切成例並不實力奉行可知又如山西遺失馬遞公文止一馬夫齎送經朕降旨詢問各督撫及覆奏僉稱向係撥馬夫二人同行果爾則河南遺失本箱一案又因何止有一人馳遞乎凡用馬馳齎之事派撥二人同送原以備驚跌失誤本章關繫緊要獨不當照馬遞公文例乎看來外省諸事因循成習督撫惟於每事初奉諭旨時稍爲經意數年後視若具文久卽置之高閣積習相沿恬不爲怪豈國家倚任封疆之意督撫等可不痛自湔滌致干咎戾也至於府州縣各官膺司牧之寄自應以民事爲重於地方利弊民生休戚風俗澆漓留心講求方爲無忝厥職若辦差不過庶務中之一節果優於撫民而拙於差務並

不失爲循良設視辦差爲殿最則所謂惴惴無華歲計有餘者又何以稱焉且如裴宗錫李湖鄭大進皆非直隸能辦差之人朕以其盡心民事皆擢用至巡撫尤直隸地方官所共知者而謂朕之所取在辦差乎不在辦差乎况朕每年巡幸熱河進哨秋獮仍遵循祖制習勞肄武而臨幸盛京則因展謁祖陵卽前此屢舉南巡之典亦因閱視河工海塘及入疆觀風問俗藉以察吏阜民並非因遊觀山水寄情吟詠也且一應供頓皆發公帑絲毫不擾閭閻所至惟令埽除不許侈陳華麗又有何辦差之可言顧欲以此藉口可乎昨周元理奏請將河南南陽府知府莊鈞與直隸大名府知府永甯對調及陝西朝邑縣知縣金嘉言與直隸新城縣知縣王垣對調皆以辦差爲名經吏部以違例議駁朕因莊鈞原係直隸知州因迴避別用故照該督所請而金嘉言之隔省對調

實屬非宜則從部議朕惟視事之當行與否酌爲准駁並不以辦
差爲權衡恐各省不知轉相效尤實有關於吏治且亦不成政體
又周元理所奏屬員賢否單於按察使達爾吉善稱其雖不能辦
差人尙小心謹飭是該督竟以差務爲重而以地方公事爲次是
何言耶周元理著飭行朕臨御以來無日不心周民隱並嚴飭廢
弛之習每於各督撫奏事隨時訓誡何尙不能深體朕意實力奉
行耶嗣後務宜各加省改毋忽教養斯民正務以副朕諄切訓諭
之意將此通行宣諭知之○乙卯諭我國家開創之初明季諸臣
望風歸附者多雖皆臣事興朝究有虧於大節自不當與范文程
諸人略無區別因命國史館以明臣之降順者另立貳臣傳據實
直書用彰公是茲念諸人立朝事蹟既不相同而品之賢否邪正
亦判然各異豈可不爲之分辨淄澠如洪承疇在明代身膺閫寄

李永芳曾乘障守邊一旦力屈俘降歷躋顯要律以有死無貳之義固不能爲之諱然其後洪承疇宣力東南頗樹勞伐李永芳亦屢立戰功勲績並爲昭著雖不克終於勝國實能效忠於本朝昔戰國豫讓初仕范中行後事智伯卒伸國士之報後之人無不諒其心而稱其義則於洪承疇等又何深譏焉至如錢謙益素行不端及明祚旣移率先歸命乃敢於詩文陰行詆毀是爲進退無據非復人類又如龔鼎孳曾降闖賊受其僞職旋更投順本朝並爲清流所不齒而其再仕以後惟務覲顏持祿毫無事蹟足稱若與洪承疇等同列貳臣傳不示等差又何以昭彰渾著交國史館總裁於應入貳臣傳諸人詳加考覈分爲甲乙二編俾優者瑕瑜不掩劣者斧鉞懍然於以傳信簡編而待天下後世之公論庶有合於春秋之義焉然朕所以爲此言者非獨爲臣子勵名教而植綱

常實欲爲君者當念苞桑而保宗社蓋此諸人未嘗無有用之才誠使明之守成者能慎持神器而弗失則若而人皆足任心膂股肱祖業於是延人才卽於是萃故有善守之主必無二姓之臣所以致有二姓之臣者非其臣之過皆其君之過也崇禎臨終之言不亦舛乎○諭朕前降旨將英親王阿濟格子孫均復還黃帶子敘入宗譜乃推廣皇祖恩意俾其子孫得列天潢今據吏部奏稱復入宗室之見任人員俱應一體出缺以宗人府職官對品改補固屬遵照定例但念伊等向列仕籍原在未復黃帶子之前若因此而令將見缺全出候補無期是朕此次施恩惟使其宗支奕世蒙庥而見在職官轉不得同時被澤矣著加恩將此項改歸宗室之見任京外人員其本身均留原職仍與滿洲人員一體升轉毋庸出缺改補其見在候補候敘人員亦仍以滿洲員缺照舊銓

用其未經出仕之子孫自當仍照宗人府舊例行至官學生係向
未出仕之人俱卽改歸宗學○丙辰命喀爾沁王等旗所屬七鄉
隸八溝廳管轄○己未命翰林院編修檢討輪班引見

三月壬戌諭朕因我朝開國時宗室懿親勤勞佐命其殊勲茂績
實爲史冊罕有如睿親王多爾袞受誣黜爵豫親王多鐸緣事降
封朕爲覈其生平事蹟昭雪加恩復還原封世襲又禮親王代善
鄭親王濟爾哈朗肅親王豪格克勤郡王岳託等並令稱其原號
用昭惇敘酬庸渥典其餘諸王貝勒內或有顯著功績而封爵後
經降奪者除本人身罹重愆不當復邀優典外若係承襲之子孫
獲咎議處竟將初封褫革未爲平允因令軍機大臣會同宗人府
查明具奏今據開列清單進呈朕詳加閱覈如饒餘親王阿巴泰
及其子安親王岳樂俱屢著功績其子孫內止有奉恩將軍一人

不足以酬勞伐著加恩賞封輔國公一人又敬謹親王尼堪功勳
頗顯且以力戰捐軀其子孫內見在止有一輔國公亦著加恩晉
封鎮國公王謙郡王瓦克達異親王滿達海鎮國公屯齊從前亦
均著有功績見無承襲之人並著加恩瓦克達子孫賞給一等鎮
國將軍滿達海子孫賞給一等輔國將軍屯齊子孫賞給一等奉
國將軍此次加賞之公爵世職俱著世襲罔替所有應襲之子孫
均著宗人府照例揀選數人帶領引見○甲子 上啓鑾謁 泰
陵 泰東陵○戊辰 上謁 泰陵 泰東陵○己巳以清明節
上躬祭 泰東陵回鑾○壬申諭鄭大進奏三月初五六日據
開封等處報稱各得雨三四五寸雖衛輝府屬未據報到而天慳
已破秋種無慮失時等語措詞甚爲失當已於摺內批諭矣雨澤
偶有愆期我君臣惟當動色相戒以冀感召天和而封圻大吏爲

民請命尤宜返躬思咎懇籲天恩一切將以寅畏庶得仰邀渥澤
至天慳已破一語迹涉遊戲在詩人拈弄筆墨或偶一用之何得
於奏牘內妄爲引用殊乖敬謹之道且卽臣下有所求請一時未
卽加恩尙不得謂君爲慳吝豈有於設壇虔籲天恩之時而漫爲
此言其能邀福佑乎鄭大進一任庸劣幕賓率意撫拾不知檢點
若此著傳旨申飭並著傳諭各督撫等知之○癸酉 上臨奠禮
烈親王代善園寢○甲戌諭向來江省淮徐淮揚兩道因兼管河
務一切差委俱不調派所有河南之開歸陳許道彰懷衛道山東
之兗沂曹道三缺亦係分管黃河南北兩岸工程修防緊要必須
該道往來工次董率妥辦未便遠離嗣後著照江南之例各該撫
不得調派科場執事及委署別缺以重河防而專責守○乙亥

上閱健銳營兵○丙子 上還京師○甲申諭刑部議覆李侍堯

奏審建水令孫鐸短價派買倉穀一案據稱孫鐸因買補倉穀每石發銀五錢交倉書王萬年轉派縣民鄒浩等分買因彼時市價較昂孫鐸諭令將原價繳回王萬年乘機舞弊勒貼銀兩以致鄒浩無力措繳情急自縊該督將孫鐸擬以杖流其承審此案故出孫鐸短價派買罪名之柳元煌擬以杖六十徒一年刑部照擬奏覆尙未允協此案孫鐸既短價派買於前後縱役索詐於後致令無辜鄉民畏累縊斃至審供時又復匿情混供情罪較重柳元煌承審此案迴護同官並以採買囚糧並無短價派勒情事曲爲開脫尤爲外省官官相護惡習朕臨御以來飭紀整綱歷久勿懈凡內外告發案件無不徹底清釐從不肯顛預了事卽如前年李承訥在大學士舒赫德前控告伊子舒甯夥占煤窰一案當經舒赫德奏明派王大臣嚴審按律辦理近日郭天玉在誠親王弘暢前

控告伊弟弘旰莊頭廬密訛占地畝一案經弘暢奏明交軍機大臣會同刑部審辦以王大臣子弟事發到官尙不能稍爲瞻顧容隱內外官吏自應更加儆惕凡查審案件俱各秉公據實不敢絲毫瞻徇乃孫鐸隱匿真情希圖蒙混柳元煌復袒護同官故出短價派買之罪所擬杖流杖徒均未足蔽其事孫鐸著從重改發伊犁充當苦差柳元煌著卽照原擬孫鐸罪名改爲杖一百流三千里不准納贖李侍堯等審擬此案原定罪名未免輕縱本應交部議處因係該督等自行查出參奏此次姑加恩寬免該督等當益知戒懼也此等縱役斃命又兼袒護同官之案於吏治官方大有關係不可不力爲整頓明白宣示將此通諭中外知之○己丑蔣元益以年老休致以顏希深爲兵部侍郎李湖爲湖南巡撫○庚寅諭從前宗室王公等往往遣屬下官員及太監等向外官說事

自 皇考臨御整飭肅清今貝子弘旿因莊頭事遣護軍校劉成泰請託通永道宋英玉此皆朕過寬之故若不嚴行整飭則漸積成風久之阿哥等亦相率效尤可乎前因繇德向禮部郎中秦雄襲相餽書籍等物革伊王爵弘旿豈竟不知今敢遣人向地方官請託此事斷難寬貸著將弘旿貝子都統全行革退仍交軍機大臣會同宗人府議處將此旨通行曉諭嗣後務各凜遵若似此濫行斷不寬貸○諭軍機大臣等誠親王弘暢奏郭天玉控告伊弟貝子弘旿莊頭盧密訛占旗地一案交軍機大臣會同刑部查審究出弘旿差遣劉成泰將盧密呈詞送通永道衙門該道宋英玉接收隨批遵化州轉行玉田縣辦理該縣金之忠隨將盧密釋放等情具奏披閱之下深爲駭異直省爲三輔近畿所有王公大臣旗莊地畝均坐落各該州縣地方周元理身任總督自應持正秉

公毫無瞻顧遇有案件董率屬員據實審辦其屬員內如有瞻徇私情審辦不公亦應據實查明參奏方無忝察吏之任今宋英玉於盧密一案竟敢公然受弘賄託批准辦理且以外省道員公然與乾清門行走之貝子等執手問好周元理不可誘爲不知自當早行誠飭俾屬員知所畏憚乃竟毫無整飭所謂察吏者若何若明知不辦則其居心更不可問直隸吏治廢弛如此周元理實難辭咎著傳旨嚴行申飭此案宋英玉已經革職治罪周元理姑從寬免其深求仍照例交部議處嗣後如有似此案件恐周元理不能當其咎也

夏四月辛卯朔以河南旱命減開封等五府軍流以下罪○癸巳諭軍機大臣等昨鄭大進來京陛見召對時詢問榮柱居官辦事如何據奏榮柱才具本優操守亦謹但恐少年時露高興伊每加

裁抑望其成就等語鄭大進據實陳奏頗得大臣之體朕深爲嘉許榮柱才具原可造就所以不卽用爲巡撫者原望其歷練成材再加擢用從前徐績在河南時伊實未免高興徐績亦意存遷就不能董率訓誡是以將伊改用侍郎至榮柱係德福之子伊見文綬之子國泰擢任巡撫未免心存希冀豈知朕於用人之際權衡高下一秉至公不肯絲毫假借卽國泰之用巡撫亦因其近年辦事克勤並非因看文綬顏面至德福以資深年久用爲尙書又豈肯因德福遂加恩其子乎鄭大進此奏實於榮柱有益伊若能虛心受善愈加勉勵諸事謹飭自能長受朕恩若因此稍生嫌隙則是自取咎戾朕不能爲榮柱寬也將此傳諭榮柱至鄭大進見在京師並將此旨交伊閱看○乙未諭前以遼金元三史內人名字義多未妥協因命編纂諸臣遵照同文韻統所載詳加更正蓋緣

還金元入主中國時其人未盡通曉漢文以致音同誤用而後之爲史者既非本國人更借不雅之字以寓其詆毀之私是三史人名不可不亟爲釐定而昭大公之本意也至本朝發祥定鼎以來文武兼資所有王公大臣載在史冊昭著耳目人所共知其命名之初原係斟酌文義清漢合宜若必拘同文韻統所載與還金元史一體更改將令前此諸臣傳之奕禩莫辨誰何而見在諸臣之名字又斷不能盡改若有改有不改前後參差互異轉不足以示來茲著傳諭各館總裁等嗣後所辦各書如遇本朝人名第當以實錄爲準不必另行譚改其從前已經辦過各書亦著一併更正以昭畫一○戊戌諭據巴延三等奏訪獲舉人王爾揚所作李範墓誌於考字上擅用皇字實屬悖逆見派李承鄴等馳赴各犯家內逐細搜查卽將該犯等押解來省嚴審定擬等語此係迂儒

用古並非叛逆已於摺內批示矣皇考之字見於禮經屈原離騷及歐陽修瀧岡阡表俱曾用之在臣子尊君敬上之義固應迴避但迂腐無知泥於用古不得謂之叛逆至趙擴代爲書寫厥咎更輕若本科會試中式亦不過於榜止扣除今旣未經取中下科仍可令其會試其李掄元更無論矣朕理事務得其平如王錫侯之實係叛逆斷不肯稍爲寬縱若此事並非叛逆亦不肯漫無區別率予嚴懲此事竟可無庸查辦將此通諭知之○諭軍機大臣等據王亶望覆奏湖州府水利情形必須疏濬宣暢若蒙親蒞指授實該郡萬世之福等語前者南巡四次俱未臨蒞湖州今該郡水利旣關繫兩郡農桑疏導最爲緊要且據稱童叟就瞻情切朕自當親臨閱視以慰輿情所有經由道路即可照該撫所奏辦理其舟行緯道止須略爲修整沿途更不得稍事點綴所有古蹟名勝

止須將舊有規模量加葺治斷不可絲毫贅費致涉浮華該撫務須善體朕意妥協經理將此諭令王亶望知之○庚子以京師旱命減刑部及直隸軍流以下罪○辛丑諭軍機大臣等前曾恭送五朝寶錄並玉牒至盛京尊藏向於正殿後建有敬典崇謨二閣原爲留都金匱石室之儲頃詢之德保知實錄尊藏鳳凰閣玉牒則在敬典閣陳貯而崇謨閣見在空閒與建閣命名之義殊未相稱著傳諭弘晌將崇謨閣上悉心相度如制尙寬廣可容書櫺排列卽敬移五朝寶錄至彼尊藏方爲允協或同藏或分代恭貯皆可至玉牒每十年一次修葺告成卽應續送將來積久愈多或敬典閣不敷存貯卽於鳳凰閣均勻收藏亦無不可再敬典崇謨二閣及頤和迪光等殿係乾隆幾年創建盛京自有檔冊可稽並著弘晌卽行查明一併覆奏將此由四百里諭令知

之○訓正文體定制義七百字之限○癸卯予故和碩肅親王蘊
著祭葬諡曰勤○乙巳 上詣 黑龍潭祈雨○丙午諭高樸等
奏報阿奇木伯克貝勒職銜鄂對於三月二十一日病故鄂對於
平定回部之前卽來投降又曾隨將軍大臣等在軍前出力茲聞
溢逝朕心深爲憫惻著加恩由該處賞給銀三百兩其貝勒職銜
卽令伊子鄂斯璊承襲所遺葉爾羌阿奇木伯克員缺著巴提巴
爾第調補喀什噶爾阿奇木伯克員缺著鄂斯璊調補阿克蘇阿
奇木伯克員缺著交綽克托等另行選人奏請補放再巴提巴爾
第移往葉爾羌鄂斯璊移往喀什噶爾不無費用著加恩由該處
各賞銀一百兩○戊申 上閱火器營兵○辛亥命減河南全省
軍流以下罪○乙卯賜戴衢亨等一百五十七人進士及第出身
有差○己未諭 萬壽節督撫毋得貢獻

五月丁卯命山西巡撫兼理鹽政○戊辰予故和碩怡親王弘曉祭葬諡曰僖○辛未軍機大臣等議奏盛京宗室覺羅向立官學原爲肄習漢文而設但宗室覺羅子弟自當以熟練弓馬及學習繙譯爲先務至欲兼習漢文則該處之舉貢生員等自爲師承留心講貫亦無難於通曉應請將盛京額設宗室覺羅教習之例停止從之○壬午召奇寵格來京以楊廷樺爲福建按察使○甲申命濟衛河上源及山東汶水○乙酉諭雍正元年曾奉 皇考諭旨太監等見諸王大臣進內必須起立行走必須讓路以存恭敬令總管太監等不時嚴傳與眾太監如有違犯必不輕恕本日朕在乾清宮西暖閣於窗內望見西廊下有穿補服者二人向北行走又有一不穿補服者南行相遇並不讓路因思補服者必係職官其不穿補服者必係太監旣已相遇自宜在旁避讓乃竟交臂

不顧全無恭敬之心皆總管太監等日久視爲具文不能管教之
故今經朕目覩不可不防其漸著嚴行傳諭總管太監務須隨時
教飭約束毋許肆慢無禮此後如再不懷遵將總管首領太監等
一併治罪

六月辛卯塘古泰因病解任以達椿爲內閣學士

由大理寺卿遷

○壬申

刑部宗人府奏民人竇通高二毆傷覺羅赫蘭泰寶興照例擬以
杖徒赫蘭泰寶興照例擬杖折罰得旨此案刑部宗人府會審將
竇通高二照毆傷覺羅律擬以杖徒覺羅赫蘭泰寶興照不應重
律擬杖折罰所辦尙未允協常人毆辱宗室覺羅律有專條者固
欲使齊民之不敢輕褻天潢亦隱示宗室各當律身自重也若宗
室覺羅並不與人爭較而常人輒敢毆及自當照律科罪若宗室
覺羅先已尋釁毆人其人因而還手則是宗室覺羅不知愛惜自

取其辱卽當以鬪毆論彼此同科不應更爲區別且宗室覺羅各有養贍錢糧尤宜在家安分若輕入茶坊酒肆已自失其尊貴體面不爲不足惜之人儻復滋事召侮行同無賴又豈可曲加優異乎至向以曾否拴繫黃紅腰帶爲分雖亦別嫌明微之意但恐宗室覺羅因有此例轉恃黃紅腰帶爲護符動輒毆人肆橫毫無顧忌所謂愛之適以害之也况宗室覺羅犯該笞杖者例當准以折罰錢糧已存議親之典更何必多其條例導之犯法乎嗣後審擬此等案件如宗室覺羅並未生事常人擅行毆及者自當照例杖徒問擬若係宗室覺羅先行動手者卽照尋常鬪毆論其曾繫黃紅腰帶與否竟不必論庶共知儆畏各以禮義自閑期無負朕教誨成全之意著交刑部會同宗人府另行妥議條例具奏此案卽照例行尋議宗室覺羅輕入茶坊酒肆滋事召侮或與人鬪毆不

論曾否腰繫紅黃帶子其相毆之人照尋常鬪毆一體定擬其宗室覺羅應得罪名亦按律定擬寶興赫蘭泰寶通高二卽照新例更改從之○乙未諭本日據大學士于敏中面奏伊塔任嘉春捐納分發主事籤掣戶部雖例不迴避但誼屬至戚理應避嫌請交部另掣等語任嘉春著分發刑部學習行走至在京各部院堂司等官雖非外任上司屬員可比亦有管轄考覈之責而外姻親屬中如翁婿甥舅之類戚誼最爲切近向例槩不迴避究屬未協著該部另行定議具奏尋議各部滿漢堂司各官外姻親屬中母之父及兄弟妻之父及兄弟己之女婿嫡甥在同衙門令官小者迴避同官者令後進者迴避至筆帖式雖無辦事之責然祖孫父子兄弟伯叔情誼至篤如在同衙門難免瞻顧向例無迴避明文今請司官筆帖式如有祖孫父子伯叔兄弟同衙門者亦令官小者

迴避同官者令後進者迴避若同係筆帖式仍毋庸迴避從之○
丁酉諭軍機大臣等據鄭大進奏各屬得雨情形一摺內有嶽瀆
效靈之語不應爲此言以施澤濟民之事目爲效靈朕聞之心甚
不安昨榮柱摺中用此語曾傳諭訓示今鄭大進復如此措詞何
皆心存慢忽不知敬奉神明乎又據稱輝縣獲嘉修武新鄭武陟
林縣得雨尙未霑足甘霖之續沛旦暮可以豫期等語尤爲失當
已於摺內批示豫省雨澤久愆朕宵旰焦勞幾於無策茲命虔禱
嶽祇幸卽渥霑甘澍救百萬蒼生之命朕感謝之餘倍深寅畏鄭
大進身爲巡撫亦當常體此心以邀靈貺豈可意存滿足且謂旦
暮可期數月來伊等非不設壇祈雨而屢求不應未必非此等輕
忽之心所致也所有未經霑足之輝縣等六縣仍宜籲邀優澍並
令各該縣一體設法誠求務期普渥甘膏及時趕種秋稼以冀有

收豈可因他處均需置此六縣於膜外聽其向隅乎至於章奏自有體裁措語尤宜明順屢見該撫奏摺多有妄用文調及辭不達意之處該撫素能實心辦事奏牘本非所長亦當慎選幕賓妥爲繕彙該撫惟當將通體大意悉心覈定轉不必於字句之間率意推敲致令文氣晦滯亦不得圖省脩金延請庸劣不通之人輕略從事也將此傳諭知之仍將輝縣等六縣曾否得雨普徧之處卽行覆奏○己亥命浙江海塘增築坦水○辛丑諭據王直望參奏嵎縣知縣吳士映年力衰邁辦事每多遲誤近則益復隳頽請勒令休致等語吳士映著革職該員年力衰頽必非一日王直望莅任已將一載豈無見聞何不早爲糾劾至今始具奏耶必係聞楊景素抵問後卽有參劾知府徐元等之事恐伊到浙江時察出吳士映衰老情形必然劾辦故該撫豫爲此奏耳且因嵎縣有抗糧

毆官之事而卽參縣官亦非政體王直望著交部嚴加議處守令
爲親民之官責任綦重有劣蹟者自應立挂彈章卽衰庸者亦宜
隨時劾退若任意姑容戀棧必至貽誤地方豈整飭吏治之道此
等積習恐不獨浙閩爲然各宜實力整頓將此通諭各省督撫知
之○以劉樽爲陝西按察使由安徽甯池
廣太道遷○甲寅以曹文埴爲左
副都御史原任
詹事
閏六月癸亥河南祥符縣河溢○癸酉命截留江西漕糧十萬石
於河南備糶